



書名五燈會元

(第拾壹)

冊) 共拾陸冊

刊寫時代明覆宋本

裝式綫裝鑲襯

卷數第拾伍

葉數陸拾肆葉

行格半葉拾叁行行式拾肆字

高廣高柒寸廣壹尺

邊口左右雙綫白口上口標字數魚尾下標五燈幾下標佛名下標葉

教下口間有刻工名氏

首有本館朱文長印

印章

其他標識

及狀況

覆查加注

共冊數上應加存字

檢查者譚新嘉

覆查者龔汝僖

中華民國十三年肆月玖日

五燈會元卷第十五

雲門宗

青原下六世

雪峰存禪師法嗣

雲門文偃禪師

青原下七世

雲門偃禪師法嗣

白雲子祥禪師

巴陵顯鑒禪師

香林澄遠禪師

泐潭道謙禪師

雙泉郁禪師

舜峰義韶禪師

德山緣密禪師

雙泉師寬禪師

洞山守初禪師

奉先深禪師

披雲智寂禪師

般若啓柔禪師



檢查者譚新嘉
覆查者饒汝僖

書名五燈會元

(第拾壹

冊) 共拾陸冊

刊寫時代明覆宋本

裝式綫裝鑲襯

卷數第拾伍

葉數陸拾肆葉

行格半葉拾叁行行式拾肆字

高廣高柒寸廣壹尺

邊口左右雙綫白口上口標字數魚尾下標五燈幾下標佛名下標葉

數下口間有刻工名氏

首有本館朱文長印

印章

其他標識

及狀況

覆查加注

共冊數上應加存字

中華民國十三年肆月玖日

五燈會元卷第十五

雲門宗

青原下六世

雪峰存禪師法嗣

雲門文偃禪師

青原下七世

雲門偃禪師法嗣

白雲子祥禪師

德山緣密禪師

巴陵顯鑒禪師

雙泉師寬禪師

香林澄遠禪師

洞山守初禪師

泐潭道謙禪師

奉先深禪師

雙泉郁禪師

披雲智寂禪師

舜峰義韶禪師

般若啓柔禪師

三五

雲門

妙勝臻禪師

薦福承古禪師

清涼智明禪師

南臺道遵禪師

雙峰竟欽禪師

資福詮禪師

黃雲元禪師

龍境倫禪師

雲門爽禪師

白雲聞禪師

淨法章禪師

溫門滿禪師

大容謹禪師

羅山崇禪師

雲門常寶禪師

林谿竟脫禪師

韶州廣悟禪師

華嚴慧禪師

長樂政禪師

英州觀音和尚

韶州林泉和尚

雲門照禪師

黃檗法濟禪師

康國耀禪師

谷山豐禪師

羅漢匡果禪師

滄溪璘禪師

洞山清稟禪師

北禪寂禪師

天王永平禪師

永安朗禪師

湘潭明照禪師

青城乘禪師

普通封禪師

淨源真禪師

大梵圓禪師

藥山圓光禪師

鷲湖雲震禪師

開先清耀禪師

奉國清海禪師

韶州慈光禪師

雙峰慧真禪師

保安師密禪師

雲門法球禪師

佛陀遠禪師

慈雲深禪師

化城鑒禪師

廬山護國和尚

天王徽禪師

廬山慶雲和尚

永福朗禪師

芭蕉弘義禪師

趙橫山和尚

西禪欽禪師

南天王海禪師

覺華普照禪師

鐵幢覺禪師

延長山和尚

福化充禪師

黃龍贊禪師

大聖守賢禪師

天柱山和尚

雲門朗上座

纂子山庵主

青原下八世

白雲祥禪師法嗣

連州寶華和尚

韶州大歷和尚

南雄地藏和尚

月華山月禪師

後白雲和尚

樂淨含匡禪師

白雲福禪師

德山密禪師法嗣

文殊應真禪師

南臺勤禪師

德山紹晏禪師

黑水承璟禪師不列

鹿苑文襲禪師

藥山可瓊禪師

乳明普禪師

中梁山崇禪師

黃龍志愿禪師

東禪秀禪師

普安道禪師

巴陵鑒禪師法嗣

泐潭靈澄散聖

興化興順禪師

雙泉寬禪師法嗣

五祖師戒禪師

福昌重善禪師

乳明居信禪師不列

四祖志誣禪師

興化奉能禪師

天睦慧滿禪師

建福智同禪師

延慶宗本禪師

大龍炳賢禪師

自巖上座

香林遠禪師法嗣

智門光祚禪師

灌州羅漢和尚

香林信禪師

洞山初禪師法嗣

福嚴良雅禪師

開福德賢禪師

報慈嵩禪師

乾明睦禪師

廣濟同禪師

東平洪教禪師

泐潭謙禪師法嗣

丫山宗盛禪師

奉先深禪師法嗣

蓮華峰祥庵主

崇勝御禪師

雙泉郁禪師法嗣

德山慧遠禪師

含珠山彬禪師

披雲寂禪師法嗣

開先照禪師

金陵天寶和尚

舜峰韶禪師法嗣

桃園曦朗禪師

法雲智善禪師

般若柔禪師法嗣

藍田縣真禪師

妙勝臻禪師法嗣

雪峰欽山主

薦福古禪師法嗣

淨戒守密禪師

清涼明禪師法嗣

祥符雲豁禪師

青原下九世

文殊真禪師法嗣

洞山曉聰禪師

南臺勤禪師法嗣

高陽法廣禪師

德山晏禪師法嗣

德山志先禪師

黑水璟禪師法嗣

黑水義欽禪師

五祖戒禪師法嗣

泐潭懷澄禪師

北塔思廣禪師

雲蓋志顯禪師

石霜節誠禪師

洞山自寶禪師

四祖端禪師

海會通禪師

洞山妙圓禪師

天童懷清禪師

五祖秀禪師

水南智昱禪師

福昌善禪師法嗣

上方齊岳禪師

金山瑞新禪師

軋明信禪師法嗣

蔡山彞肅禪師

智門祚禪師法嗣

雪竇重顯禪師

百丈智映禪師

護國壽禪師

義臺子祥禪師

寶嚴叔芝禪師

白馬辯禪師

育王常坦禪師

夾山惟俊禪師

不列

延慶子榮禪師

南華寶緣禪師

九峰勤禪師

雲蓋繼鵬禪師

黃龍海禪師

彰法澄泗禪師

雲臺省因禪師

福巖雅禪師法嗣

北禪智賢禪師

衡嶽振禪師

開福賢禪師法嗣

日芳上座

報慈嵩禪師法嗣

興陽遜禪師

德山遠禪師法嗣

開先善暹禪師

欽山悟勤禪師不列章次

禾山楚材禪師

資聖盛勤禪師

鹿苑圭禪師

青原下十世上

洞山聰禪師法嗣

雲居曉舜禪師

大瀉懷宥禪師

佛日契嵩禪師

太守許式郎中

泐潭澄禪師法嗣

育王懷璉禪師

靈隱雲知禪師

承天惟簡禪師

九峰鑒韶禪師

西塔顯殊禪師

崇善用良禪師

慧力有文禪師

雪峰象敦禪師

雲居守億禪師

洞山永孚禪師

令滔首座

洞山寶禪師法嗣

洞山清辯禪師

北塔廣禪師法嗣

玉泉承皓禪師

四祖端禪師法嗣

廣明常委禪師

雲蓋顯禪師法嗣

雲居文慶禪師

上方岳禪師法嗣

國慶順宗禪師

金山新禪師法嗣

天聖守道禪師

夾山俊禪師法嗣

夾山遵禪師

不列章次

青原下六世

雪峰存禪師法嗣

韶州雲門山光奉院文偃禪師嘉興人也姓張氏幼依空王寺

志澄律師出家敏質生知慧辯天縱及長落髮稟具於毗陵壇

侍澄數年探窮律部以已事未明往叅睦州州纔見來便閉却

門師乃扣門州曰誰師曰某甲州曰作甚麼師曰已事未明乞

師指示州開門一見便閉却師如是連三日扣門至第三日州

開門師乃撥入州便擒住曰道道師擬議州便推出曰秦時轆

轆鑽遂掩門指師一足師從此悟入州指見雪峰師到雪峰莊

見一僧廼問上座今日上山去那僧曰是師曰寄一則因緣問

堂頭和尚祇是不得道是別人語僧曰得師曰上座到山中見

和尚上堂衆纔集便出握腕立地曰這老漢項上鐵枷何不脫

却其僧一依師教雪峰見這僧與麼道便下座攔臂把住曰速

道速道僧無對峰拓開曰不是汝語僧曰是某甲語峰曰侍者

將繩棒來僧曰不是某語是莊上一浙中上座教某甲來道峰

將繩棒來僧曰不是某語是莊上一浙中上座教某甲來道峰

六廿二
五十五
靈樹章
曰目前無異路
得已向諸人前作一場狼籍忽遇明眼人
避不得也且問你諸人從上來有甚事
已是相埋沒也雖然如是也須到這田地始得亦莫越口快亂
問自己心裏黑漫漫地明朝後日大有事在你若根思遲回且
向古人建化門東觀西觀看是箇甚麼道理你欲得會麼都

緣是你自家無量劫來妄想濃厚一期間人說著便生疑心問
佛問法問向上向下求覓解會轉沒交涉擬心即差况復有言
有句莫是不擬心是麼莫錯會好更有甚麼事珍重上堂我事
不獲已向你諸人道直下無事早是相埋沒了也更欲踏步向
前尋言逐句求覓解會千差萬別廣設問難贏得一場口滑去
道轉遠有甚麼休歇時此事若在言語上三乘十二分教豈是
無言語因甚麼更道教外別傳若從學解機智得祇如十地聖
人說法如雲如雨猶被呵責見性如隔羅縠以此故知一切有
心天地懸殊雖然如此若是得底人道火不能燒口終日說事
未嘗挂著唇齒未嘗道著一字終日著衣喫飯未嘗觸著一粒
米挂一縷絲雖然如此猶是門庭之說也須是實得恁麼始得
若約衲僧門下句裏呈機徒勞佇思直饒一句下承當得猶是
瞌睡漢時有僧問如何是一句師曰舉上堂三乘十二分教橫

說豎說天下老和尚縱橫十字說與我拈針鋒許說底道理來
看恁麼道早是死馬醫雖然如此且有幾箇到此境界不敢望
汝言中有響句裏藏鋒瞬目千差風恬浪靜伏惟尚饗僧來叅
師乃拈起袈裟曰汝若道得落我袈裟圈禳裏汝若道不得又
在鬼窟裏坐作麼生自代曰某甲無氣力師一日打椎曰妙喜
世界百雜碎拓鉢向湖南城裏喫粥飯去來上堂諸兄弟盡是
諸方叅尋知識決擇生死到處豈無尊宿垂慈方便之詞還有
透不得底句麼出來舉着待老漢與你大家商量有麼有時
有僧出擬伸問次師曰去去西天路迢迢十萬餘便下座舉世
尊初生下一手指天一手指地周行七步目顧四方云天上天
下唯我獨尊師曰我當時若見一棒打殺與狗子喫却貴圖天
下太平師在文德殿赴齋有鞠常侍問靈樹果子熟也未師曰
甚麼年中得信道生僧問如何是西來意師曰山河大地曰向

上更有事也無師曰有曰如何是向上事師曰釋迦老子在西
天文殊菩薩居東土問如何是雲門山師曰庚峰定穴問如何
是大修行師曰一棹在手上堂因聞鐘聲乃曰世界與麼廣闊
為甚麼鐘聲披七條問一生積惡不知善一生積善不知惡此
意如何師曰燭問如何是和尚非時為人一句師曰早朝牽犁
晚間拽杷舉雪峰云三世諸佛向火燄上轉大法輪師曰火燄
為三世諸佛說法三世諸佛立地聽上堂舉一則語教汝直下
承當早是撒屎著汝頭上也直饒拈一毫頭盡大地一時明得
也是剜肉作瘡雖然如此汝亦須是實到這箇田地始得若未
切不得掠虛却須退步向自己根脚下推尋看是箇甚麼道理
實無絲毫許與汝作解會與汝作疑惑况汝等各各當人有一
段事大用現前更不煩汝一毫頭氣力便與祖佛無別自是汝
諸人信根淺薄惡業濃厚突然起得許多頭角擔鉢囊千鄉萬

里受屈作麼且汝諸人有甚麼不足處大丈夫漢阿誰無分獨自承當得猶不著便不可受人欺謾取人處分纔見老和尚開口便好把特石驀口塞便是屎上青蠅相似鬪咬將去三箇五箇聚頭商量苦屈兄弟古德一期爲汝諸人不奈何所以方便垂一言坐向通汝入路知是般事拈放一邊自著些子筋骨豈不是有少許相親處快與快與時不待人出息不保入息更有甚麼身心別處閑用切須在意珍重上堂盡亂坤一時將來著汝眼睫上你諸人聞恁麼道不敢望你出來性燥把老漢打一擗且緩緩子細看是有是無是箇甚麼道理直饒你向這裏明得若遇衲僧門下好棰折脚若是箇人聞說道甚麼處有老宿出世便好驀面唾汚我耳目汝若不是箇人脚纔聞人舉便承當得早落第二機也汝不看他德山和尚見僧入門拽杖便趑睦州和尚纔見僧入門來便云見成公案放汝三十棒自餘

之非合作麼生若是一般掠虛漢食人涎唾記得一堆一擔骨董到處馳騁驢辰馬背誇我解問十轉五轉話饒你從朝問到夜論劫恁麼還曾夢見麼甚麼處是與人著力處似這般底有人屈衲僧齋也道得飯喫有甚堪共語處他日閻羅王面前不取汝口解說諸兄弟若是得底人他家依衆遣日若也未得切莫容易過時大須子細古人大有葛藤相爲處祇如雪峰道盡大地是汝自己夾山道百草頭上薦取老僧關市裏識取天子洛浦云一塵纔起大地全收一毛頭師子全身揔是汝把取翻覆思量看日夕歲深自然有箇入路此事無汝替代處莫非各在當人分上老和尚出世祇爲汝證明汝若有少許來由亦昧汝不得若實未得方便撥汝即不可兄弟一等是踏破草鞋拋却師長父母行脚直須著些子精彩始得若未有箇入頭處遇著本色齧豬狗手脚不惜性命入泥入水相爲有可齧嚼眨上

眉毛高挂鉢囊拗折拄杖十年二十年辦取徹頭莫愁不成辦
直是今生不得徹頭來生亦不失人身向此所中亦乃省力不
虛孤負平生亦不孤負師長父母十方施主直須在意莫空遊
州獵縣橫擔拄杖一千里二千里走這邊經冬那邊過夏好山
好水堪取性多齋供易得衣鉢苦屈苦屈圖他一粒米失却半
年糧如此行脚有其麼利益信心檀越把菜粒米作麼生消得
直須自看無人替代時不待人忽然一日眼光落地到前頭將
甚麼抵擬莫一似落湯螃蟹手脚忙亂無汝掠虛說大話處莫
將等閑空過時光一失人身萬劫不復不是小事莫據目前俗
人尚道朝聞道夕死可矣况我沙門合履踐箇甚麼事大須努
力珍重僧問靈樹如何是祖師西來意靈樹然遷化後門人立
行狀碑欲入此語問師曰先師默然如何上碑師對曰師上
堂佛法也太煞有祇之舌頭短良父曰長也晉請般柴次師遂

拈一片拋下曰一大藏教祇說這箇見僧量米次問米籬裏有
多少達磨眼睛僧無對師代曰斗量不盡上堂人人自有光明
在看時不見暗昏昏作麼生是諸人自己光明自代曰厨庫三
門又曰好事不如無示衆古德道藥病相治盡大地是藥那箇
是你自己乃曰遇賤即貴僧曰乞師指示師拍手一下拈拄杖
曰接取拄杖子僧接得拗作兩橛師曰直饒恁麼也好與三十
棒上堂一言纔舉千車同轍該括微塵猶是化門之說若是衲
僧合作麼生若將佛意祖意這裏商量曲溪一路平沉還有人
道得麼道得底出來僧問如何是超佛越祖之談師曰餠餅曰
這裏有甚麼交涉師曰灼然有甚麼交涉乃曰汝等諸人沒可
作了見人道著祖意便問超佛越祖之談汝且喚甚麼作佛喚
甚麼作祖且說超佛越祖底道理看箇出三界汝把將三界
來看有甚麼見聞覺知隔礙著汝有甚麼聲塵色法與汝可了

了箇甚麼。椀以那箇爲差殊之見。他古聖不奈何。橫身爲物道。箇舉體全真。物物覲體不可得。我向汝道。直下有甚麼事。早是相埋沒了也。汝若實未有入頭處。且獨自參詳。除却著衣喫飯。衲屎送尿。更有甚麼事。無端起得如許多般妄想。作甚麼。更有般底如等閑相似。聚頭學得箇古人話路。識性記持。妄想卜度道。我會佛法了也。祇管說葛藤。取性過時。更嫌不稱意。千鄉萬里。拋却父母師長。作這去就。這般打野捩漢。有甚麼死急行脚去。以拄杖趁下上堂。故知時運澆漓。代千像季。近日師僧。比去言禮文。殊南去。謂遊衡嶽。恁麼行脚。名字比丘。徒消信施。苦哉苦哉。問著黑漆相似。祇管取性過時。設有三箇兩箇狂學多聞。記持話路。到處覓相似語句。印可老宿。輕忽上流。作薄福業。他日閻羅王釘釘之時。莫道無人向你說。若是初心。後學直須擺動精神。莫空記人說處。多虛不如少實。向後祇是自賺。甚

麼事。近前上堂。衆集師以拄杖指面前曰。乾坤大地。微塵諸佛。揔在裏許。爭佛法。覓勝負。還有人諫得麼。若無人諫。得待老漢與你諫。看僧曰。請和尚諫。師曰。這野狐精。上堂拈拄杖曰。天親菩薩無端變作一條柳栗杖。乃畫一畫曰。塵沙諸佛盡在這裏。葛藤便下座。上堂我看汝諸人。二三機中。尚不能搆得空披衲衣。何益汝。還會麼。我與汝註破。父後到諸方。若見老宿。舉一指豎一拂子。云是禪。是道。拽拄杖打破頭。便行。若不如此。盡落天魔眷屬。壞滅吾宗。汝若實不會。且向葛藤社裏。看我尋常。向汝道。微塵刹土中。三世諸佛。西天二十八祖。唐土六祖。盡在拄杖頭上說法。神通變現。聲應十方。一任縱橫。汝還會麼。若不會。且莫掠虛然。雖如此。且諦當實見也。未直饒到此田地也。未夢見衲僧沙彌。在三家村裏。不逢一人。驀拈拄杖。畫一畫曰。揔在這裏。又畫一畫曰。揔從這裏出去也。珍重。師一日以手入木師子

口叫曰齧殺我也相救

歸宗系代云和尚出手太殺

上堂聞聲悟道見色明

心遂舉起手曰觀世音菩薩將錢買餅放下手曰元來祇是
饅頭上堂乾坤之內宇宙之間中有一寶秘在形山拈燈籠向
佛殿裏將三門來燈籠上作麼生自代曰逐物意移又曰雲起
雷興示衆曰十五日已前不問汝十五日已後道將一句來衆
無對自代曰日日是好日上堂拈拄杖曰凡夫實謂之有二乘
析謂之無圓覺謂之幻有菩薩當體即空衲僧家見拄杖便喚
作拄杖行但行坐但坐不得動著僧問如何是佛法大意師曰
春來草自青問新到甚處人曰新羅師曰將甚麼過海曰草賊
大敗師引手曰爲甚麼在我這裏曰恰是師曰一任踣跳僧無
對問牛頭未見四祖時如何師曰家家觀世音曰見後如何師
曰火裏蜘蛛吞大蟲問如何是雲門一曲師曰臘月二十五日
唱者如何師曰且緩緩問如何是雪嶺泥牛吼師曰山河走曰

如何是雲門木馬嘶師曰天地黑問從上來事請師提綱師曰

朝看東南暮看西北曰便恁麼會時如何師曰東家點燈西

暗坐問十二時中如何即得不空過師曰向甚麼處著此一問

曰學人不會請師舉師曰將筆硯來僧乃取筆硯來師作一頌

曰舉不顧即差互擬思量何劫悟問如何是學人自己師曰遊

山翫水曰如何是和尚自己師曰賴遇維那不在問一口吞盡

時如何師曰我在你肚裏曰和尚爲甚麼在學人肚裏師曰還

我話頭來問如何是道師曰去曰學人不會請師道師曰闍黎

公驗分明何在重判問生死到來如何排遣師展手曰還我生

死來問父母不聽不得出家如何得出家師曰淺曰學人不會

師曰深問如何是學人自己師曰怕我不知問萬機喪盡時如

何師曰與我拈佛殿來與汝商量曰豈關他事師喝曰這掠虛

漢問樹凋葉落時如何師曰體露金風問如何是佛師曰乾屎

概問如何是諸佛出身處師曰東山水上行問古人面壁意旨如何師曰念七問如何是祖師西來意師曰日裏看山師問僧近離甚麼處曰南嶽師曰我不曾與人葛藤近前來僧近前師曰去僧問如何是和尙家風師曰有讀書人來報問如何是透法身句師曰北斗裏藏身問如何是西來意師曰夕雨不晴又曰粥飯氣問承古有言牛頭橫說豎說猶未知有向上關挨子如何是向上關挨子師曰東山西嶺青問如何是端坐念實相師曰河裏失錢河裏攙上堂函蓋乾坤目機鉢兩不涉世緣作麼生承當衆無對自代曰一鏃破三關僧問如何是雲門劍師曰祖問如何是玄中的師曰禊問如何是吹毛劍師曰豁又曰齒問如何是正法眼師曰普問如何是啐啄機師曰響問如何是雲門一路師曰親問殺父殺母向佛前懺悔殺佛殺祖向甚麼處懺悔師曰露問鑿壁偷光時如何師曰恰問三身中那身

說法師曰要問承古有言了即業障本來空未了應須償宿債未審二祖是了未了師曰確師垂語曰會佛法如河沙百草頭上道將一句來自代云俱僧問如何是一代時教師曰對一說問不是目前機亦非目前事時如何師曰倒一說問如何是法身向上事師曰向上與汝道即不難作麼生會法身曰請和尚鑒師曰鑒即且置作麼生會法身曰與麼與麼師曰這箇是長連牀上學得底我且問你法身還解喫飯麼僧無對師問嶺中順維那古人豎起拂子放下拂子意旨如何順曰拂前見拂後見師曰如是如是師後却舉問僧汝道當初諾伊不諾伊僧無對師曰可知禮也問僧甚處來曰禮塔來師曰謔我曰實禮塔來師曰五戒也不持師嘗舉馬大師道一切語言是提婆宗以這箇爲主乃曰好語祇是無人問我時有僧問如何是提婆宗師曰西天九十六種你是最下種問僧近離甚麼處曰西禪師曰

西禪近日有何言句僧展兩手師打一掌僧曰某甲話在師却展兩手僧無語師又打師舉臨濟三句語問塔主祇如塔中和尚得第幾句主無對師曰你問我主便問師曰不快即道主曰作麼生是不快即道師曰一不成二不是問直歲甚處去來曰刈茆來師曰刈得幾箇祖師曰三百箇師曰朝打三千暮打八百東家杓柄長西家杓柄短又作麼生歲無語師便打僧問秋初夏末前程若有人問作麼生祇對師曰大眾退後曰未審過在甚麼處師曰還我九十日飯錢來有講僧參經時乃曰未到雲門時恰似初生月及乎到後曲彎彎地師得知乃召問是你道否曰是師曰甚好吾問汝作麼生是初生月僧乃斫額作望月勢師曰你如此已後失却自在僧經旬日後來師又問你還會也未曰未會師曰你問我僧便問如何是初生月師曰曲彎彎地僧罔措後果然失自上堂諸和尚子莫妄想天是天地是

地山是山水是水僧是僧俗是俗良久曰與我拈案山來僧便問學人見山是山水是水時如何師曰三門爲甚麼騎佛殿從這裏過曰恁麼則不妄想去也師曰還我話頭來上堂你若不相當且覓箇入頭處微塵諸佛在你舌頭上三藏聖教在你脚跟底不如悟去好還有悟得底麼出來對衆道看示衆盡十方世界乾坤大地以拄杖畫云百雜碎三乘十二分教達磨西來放過即不可若不放過不消一喝示衆真空不壞有真空不異色僧便問作麼生是真空師曰還聞鐘聲麼曰此是鐘聲師曰驢年夢見麼上堂平地上死人無數過得荆棘林者是好手時有僧出曰與麼則堂中第一座有長處也師曰蘇嚕蘇嚕長老舉菩薩手中赤幡問師作麼生師曰你是無禮漢瑄曰作麼生無禮師曰是你外道奴也作不得僧問佛法如水中月是否師曰清波無透路曰和尚從何得師曰再問復何來曰正與麼

時如何師曰重疊關山路上堂拈拄杖曰拄杖子化爲龍吞却
乾坤了也山河大地甚處得來師有偈曰不露風骨句未語先
分寸佳口喃喃知君大用指示衆大用現前不存軌則時有
僧問如何是大用現前師拈起拄杖高聲唱曰釋迦老子來也
上堂要識祖師麼以拄杖指曰祖師在你頭上踣跳要識祖師
眼睛麼在你脚跟下又曰這箇是祭鬼神茶飯雖然如此鬼神
也無厭足示衆一人因說得悟一人因喚得悟一人聞舉便回
去你道便回去意作麼生復曰也好與三十捧上堂光不透脫
有兩般病一切處不明面前有物是一又透得一切法空隱隱
地似有箇物相似亦是光不透脫又法身亦有兩般病得到法
身爲法執不忘已見猶存坐在法身邊是一直饒透得法身去
放過即不可子細點檢將來有甚麼氣息亦是病問僧光明寂
照遍河沙豈不是張拙秀才語曰是師曰話墮也僧問如何是

法身師曰六不收問不起一念還有過也無師曰須彌山問如
何是清淨法身師曰花藥欄曰便恁麼去時如何師曰金毛師
子問如何是塵塵三昧師曰鉢裏飯桶裏水問一言道盡時如
何師曰裂破問如何是佛法大意師曰面南看北斗問一切智
通無障礙時如何師曰掃地潑水相公來師到天童童曰你還
定當得麼師曰和尚道甚麼童曰不會則目前包裹師曰會則
目前包裹師到曹山見示衆云諸方盡把格則何不與他道却
令他不疑去師問密密處爲甚麼不知有山曰祇爲密密所以
不知有師曰此人如何親近山曰莫向密密處親近師曰不向
密密處親近時如何山曰始解親近師應喏喏師到鵝湖聞上
堂曰莫道未了底人長時浮逼逼地設使了得底明明得知有
去處尚乃浮逼逼地師下問首座適來和尚意作麼生曰浮逼
逼地師曰首座久在此住頭白齒黃作這箇語話曰上座又作

麼生師曰要道即得見即便見若不見莫亂道曰祇如道浮逼
逼地又作麼生師曰頭上著枷脚下著杻曰與麼則無佛法也
師曰此是文殊普賢大人境界僧舉灌溪上堂曰十方無壁落
四面亦無門淨裸裸赤灑灑沒可把師曰舉即易出也大難曰
上座不肯和尚與麼道那師曰你適來與麼舉那曰是師曰你
驢年夢見灌溪曰某申話在師曰我問你十方無壁落四面亦
無門你道大梵天王與帝釋天商量甚麼事曰豈干他事師喝
曰逐隊喫飯漢師到江州有陳尚書者請齋纔見便問儒書中
即不問三乘十二分教自有座主作麼生是衲僧行脚事師曰
曾問幾人來書曰即今問上座師曰即今且置作麼生是教意
書曰黃卷赤軸師曰這箇是文字語言作麼生是教意書曰口
欲談而辭喪心欲緣而慮忘師曰口欲談而辭喪爲對有言心
欲緣而慮忘爲對妄想作麼生是教意書無語師曰見說尚書

看法華經是否書曰是師曰經中道一切治生產業皆與實相
不相違背且道非非想天有幾人退位書無語師曰尚書且莫
草草三經五論師僧拋却特入叢林十年二十年尚不奈何尚
書又爭得會書禮拜曰某甲罪過師唱道靈樹雲門凡三十載
機緣語句備載廣錄以軋和七年己酉四月十日順寂塔全身
於方丈後十七載示夢阮紹莊曰與吾寄語秀華宮使特進李
托奏請開塔遂致奉勅迎請內庭供養逾月方還因改寺爲大
覺謚大慈雲匡真弘明禪師

青原下七世

雲門偃禪師法嗣

韶州白雲子祥實性大師初住慈光院廣主召入府說法時有
僧問覺華纔綻正遇明時不昧宗風乞師方便師曰我王有令
問祖意教意是同是別師曰不別曰恁麼則同也師曰不妨領

詰問諸佛出世普徧大千白雲一會如何舉揚師曰賺却幾人
來曰恁麼則四衆何依師曰沒交涉問即心即佛示誨之辭不
涉前言如何指教師曰東西且置南北作麼生問如何是和尚
家風師曰石橋那畔有這邊無會麼曰不會師曰且作丁公吟
問衣到六祖爲甚麼不傳師曰海晏河清問從上宗乘如何舉
揚師曰今日未喫茶上堂諸人會麼但向街頭市尾屠兒魁劊
地獄鑊湯處會取若恁麼會得堪與人天爲師若向衲僧門下
天地懸殊更有一般底祇向長連牀上作好人去汝道此兩般
人那箇有長處無事珍重問僧甚麼處來曰雲門來師曰裏許
有多少水牛曰一箇兩箇師曰好水牛問僧不壞假名而談實
相作麼生僧指倚子曰這箇是倚子師以手撥倚曰與我將鞋
袋來僧無對師曰這虛頭漢雲門問乃云須是我祥兄始得師將示滅白衆曰
某甲雖提祖印未盡其中事諸仁者且道其中事作麼生莫是

無邊中間內外已否若如是會即大地如鋪沙良父曰去此即
他方相見言訖而寂

鼎州德山緣密圓明禪師上堂僧堂前事時人知有佛歿後事
作麼生上堂我有三句語示汝諸人一句函蓋乾坤一句截斷
衆流一句隨波逐浪作麼生辨若辨得出有參學分若辨不出
長安路上輾輾地僧問如何是透法身句師曰三尺杖子攪黃
河問百花未發時如何師曰黃河渾底流曰發後如何師曰幡
竿頭指天問不犯辭鋒時如何師曰天台南嶽曰使恁麼去時
如何師曰江西湖南問佛未出世時如何師曰河裏盡是木頭
船曰出世後如何師曰這頭蹋著那頭掀上堂與麼來者現成
公案不與麼來者垛生招箭揔不與麼來者徐六擔板迅速鋒
鏑猶是鈍漢萬里無雲青天猶在上堂但參活句莫參死句活
句下薦得求劫無滯一塵一佛國一葉一釋迦是死句揚眉瞬

目舉指豎拂是死句山河大地更無請訛是死句時有僧問如何是活句師曰波斯仰面看曰恁麼則不謬去也師便打上堂舉臨濟示衆曰恁麼來者恰似失却不恁麼來者無繩自縛十二時中莫亂斟酌會與不會都盧是錯分明與麼道一任天下人賤剥師曰古鏡闊一丈屋梁長三尺是汝鉢盂鏡子闊多少上堂俱胝和尚凡有扣問祇豎一指寒則普天寒熱則普天熱僧問已事未明如何辨得師曰須彌山頂上曰便恁麼去時如何師曰脚下水淺深問達磨未來時如何師曰千年松倒挂曰來後如何師曰金剛努起拳問師未出世時如何師曰佛殿正南開曰出世後如何師曰白雲山上起曰出與未出還分不分師曰靜處薩婆訶問如何是和尚家風師曰南山起雲北山下雨問如何是應用之機師喝僧曰祇這箇爲復別有師便打問大用現前不存軌則時如何師曰黑地打破甕僧退步師便打

問佛未出世時如何師曰胡猴繫露柱曰出世後如何師曰胡猴入布袋問文殊與維摩對談何事師曰并汝三人無繩自縛問如何是佛師曰蒲目荒榛曰學人不會師曰勞而無功問盡大地致一問不得時如何師曰話墮也曰大衆揔見師便打問無蹤無跡是甚麼人行履師曰偷牛賊問羶羊未挂角時如何師曰獵屎狗曰挂後如何師曰獵屎狗問牛頭未見四祖時如何師曰秋來黃葉落曰見後如何師曰春來草自青

岳州巴陵新開院顯鑿禪師初到雲門門曰雪峰和尚道開却門達磨來也我問你作麼生師曰築著和尚鼻孔門曰地神惡發把須彌山一擗踣跳上梵天撈破帝釋鼻孔你爲甚麼向日本國裏藏身師曰和尚莫瞞人好門曰築著老僧鼻孔又作麼生師無語門曰將知你祇是學語之流師住後更不作法嗣書祇將三轉語上雲門僧問如何是道師曰明眼人落井問如何

是吹毛劒師曰珊瑚枝枝撐著月問如何是提婆宗師曰銀椀裏盛雪門曰他後老僧忌日抵消舉此三聘語足以報恩自後忌辰果如所囑僧問祖意教意是同是別師曰雞寒上樹鴨寒下水問三乘十二分教即不疑如何是宗門中事師曰不是衲僧分上事曰如何是衲僧分上事師曰貪觀白浪失却手撓問僧遊山來爲佛法來曰清平世界說甚麼佛法師曰好箇無事禪客曰早是多事了也師曰上座去年在此過夏了曰不曾師曰與麼則先來不相識下去師將拂子遺僧僧曰本來清淨用拂子作甚麼師曰既知清淨切勿忘却梁山觀別云也須拂却隨州雙泉山師寬明教禪師上堂舉拂子曰這箇接中下之人時有僧問上上人來時如何師曰打鼓爲三軍問向上宗乘如何舉唱師曰不敢曰恁麼則含生有望師曰脚下水深淺問凡有言句盡落有無不落有無時如何師曰果弗于逮曰這箇僧

洛有無師曰支過雲山西僧問洞山初和尚如何是佛山曰麻三斤師問之乃曰向南有竹向北有木問不可以智知不可以識識時如何師曰不入這箇野狐羣隊問如何是定師曰鰕跳不出斗曰如何出得去師曰南山起雲北山下雨問北斗裏藏身意旨如何師曰雞寒上樹鴨寒下水問豎起杖子意旨如何師曰一葉落知天下秋師遊山回首座同衆出接座曰和尚遊山巖嶮不易師提起拄杖曰全得這箇力座乃奪却師放身便倒大衆皆進前扶起師拈拄杖一時趁散回顧侍者曰向道全得這箇力師一日訪白兆曰老僧有箇木魚頌師曰請舉看兆曰伏惟爛木一椽佛與衆生不別若以杖子擊著直得聖凡路絕師曰此須有成禡無成禡兆曰無成禡師曰佛與衆生不別擗侍僧救曰有成禡師曰直得聖凡路絕擗當時白兆一衆失色僧問新年頭還有佛法也無師曰無曰日日是好日年年

是好年爲甚却無師曰張公喫酒李公醉僧曰老老大大龍頭
蛇尾師曰明教今日失利

益州青城香林院澄遠禪師漢州綿竹人姓上官在衆日普請
鉏草次有一僧曰看俗家失火師曰那裏火曰不見那師曰不
見曰這瞎漢是時一衆皆言遠上座敗闕後明教寬聞舉嘆曰
須是我遠兄始得住後僧問美味醍醐爲甚麼變成毒藥師曰
導江紙貴問見色便見心時如何師曰適來甚麼處去來曰心
境俱忘時如何師曰開眼坐睡問北斗裏藏身意旨如何師曰
月似彎弓少雨多風問如何是諸佛心師曰清則始終清曰如
何領會師曰莫受人謾好問如何是祖師西來意師曰踏步者
誰問如何是和尚妙藥師曰不離衆味曰喫者如何師曰喫咱
看問如何是室內一盞燈師曰三人證龜成鼈問如何是衲衣
下事師曰臘月火燒山問大衆雲集請師施設師曰三不待兩

問如何是學人時中事師曰恰恰問如何是玄師曰今日來明
日去曰如何是玄中玄師曰長連牀上問如何是香林一脈泉
師曰念無間斷曰飲者如何師曰隨方斗秤問如何是衲僧正
眼師曰不公別曰將用事如何師曰行路人失脚問萬機俱泯
迹方識本來人時如何師曰清機自顯曰恁麼則不別人師曰
方見本來人問魚游陸地時如何師曰發言必有後救曰却下
碧潭時如何師曰頭重尾輕問但有言句盡是實如何是主師
曰長安城裏曰如何領會師曰千家萬戶問如何是西來的的
意師曰坐久成勞曰便回轉時如何師曰墮落深坑問如何是
無縫塔師曰合掌當胸曰如何是塔中人師曰露也問教法未
來時如何師曰閻羅天子曰來後如何師曰大宋國裏問一子
出家九族解脫目連爲甚麼母入地獄師曰確問如何是平常
心師曰早朝不審晚後珍重上堂是汝諸人盡是擔鉢囊向外

行脚還識得性也未若識得試出來道看若識不得祇是被人
熱謾將去且問汝諸人是汝參學日以用心掃地煎茶遊山翫
水汝且釘釘喚甚麼作自性諸人且道始終不變不異無高無
下無好無醜不生不滅究竟歸於何處諸人還知得下落所在
也未若於這裏知得所在是諸佛解脫法門悟道見性始終不
疑不慮一任橫行一切人不奈汝何出言吐氣實有來處如人
買田須是收得元本契書若不得他元本契書終是不穩遮莫
經官判狀亦是不得其奈不收得元本契書終是被入奪却汝
等諸人參禪學道亦復如是還有人收得元本契書麻紙拈出
看汝且喚甚麼作元本契書諸人試道看若是靈利底纔聞與
麼說著便知去處若不知去處向外邊學得千般巧妙記持解
會口似傾河終不究竟與汝自己天地差殊且去衣鉢下體當
尋覓看若有箇見處上來這裏道看老僧與汝證明若覓不得
曰老僧四十年方打成一片言訖而逝塔于本山

且依行隊去將示寂舜知府宋公瑄曰老僧行脚去通判曰這
僧風狂八十歲行脚去那裏宋曰大善知識去住自由師謂衆
曰老僧四十年方打成一片言訖而逝塔于本山
襄州洞山守初宗慧禪師初參雲門門問近離甚處師曰查渡
門曰夏在甚處師曰湖南報慈曰幾時離彼師曰八月二十五
門曰放汝三頓棒師至明日却上問訊昨日蒙和尚放三頓棒
不知過在甚麼處門曰飯袋子江西湖南便恁麼去師於言下
大悟遂曰他後向無人煙處不蓄一粒米不種一莖菜接待十
方往來盡與伊抽釘拔楔拈却炙脂帽子脫却鷓鴣臭布衫教伊
洒洒地作箇無事衲僧豈不快哉門曰你身如椰子大開得如
許大口師便禮拜住後上堂言無異事語不投機承言者喪滯
句者迷還得麼你衲僧分上到這裏須具擇法眼始得祇如洞
山恁麼道也有一場過且道過在甚麼處僧問迢迢一路時如

何師曰天晴不肯去直待雨淋頭曰諸聖作麼生師曰入泥入水問心未生時法在甚麼處師曰風吹荷葉動決定有魚行問師登師子座請師唱道情師曰晴乾開水道無事設曹司曰恁麼則謝師指示師曰賣鞋老婆脚趂切趂切亦問如何是三寶師曰商量不下問如何是無縫塔師曰十字街頭石師子問僧甚處來曰汝州師曰此去多少曰七百里師曰踏破幾緉草鞋曰三緉師曰甚處得錢買曰打笠子師曰叅堂去僧應喏問如何是免得生死底法師曰見之不取思之三年僧問離却心機意識請師一句師曰道士著黃羅裏裏亦問非時親覲請師一句師曰對衆怎生舉曰據現定舉師曰放汝三十棒曰過在甚麼處師曰罪不重科問如何是佛師曰麻三斤問蓮華未出水時如何師曰楚山頭倒卓曰出水後如何師曰漢水正東流問如何是吹毛劍師曰金州客曰用者如何師曰伏惟尚饗問草

住牛不住時如何師曰用駕車漢作麼問如何是衲僧分上事師曰雲裏楚山頭決定多風雨問海竭人亡時如何師曰難得曰便恁麼去時如何師曰雲在青天水在瓶問文殊普賢來叅時如何師曰趨向水牯牛欄裏著曰和尚入地獄如箭射師曰全憑子力問如何是正法眼師曰紙撚無油問牛頭未見四祖時如何師曰榔栗木拄杖曰見後如何師曰寶入布衫問如何是佛師曰灼然諦當問萬緣俱息意旨如何師曰甕裏石人賣棗圈問如何是洞山劍師曰作麼曰學人要知師曰罪過問乳坤休著意宇宙不留心學人祇恁麼師又作麼生師曰峴山亭起霧灘峻不留船問大衆雲臻請師撮其樞要略舉大綱師曰水上浮漚呈五色海底蝦蟇叫月明問正當恁麼時文殊普賢在甚麼處師曰長者八十一其樹不生耳曰意旨如何師曰一則不成二則不是

法州泐潭道謙禪師僧問如何是泐潭家風師曰闍黎到來幾日也問但有纖毫即是塵不有時作麼生師以手掩兩目問當陽舉唱誰是聞者師曰老僧不患耳聾問悟本無門如何得入師曰阿誰教汝恁麼問

金陵奉先深禪師江南主請開堂纔升座維那白槌曰法筵龍象衆當觀第一義師便曰果然不識鈍置殺人時有僧出問如何是第一義師曰賴遇適來道了也曰如何領會師曰速禮三拜復曰大衆且道鈍置落在阿誰分上師同明和尚在衆時聞僧問法眼如何是色眼豎起拂子或曰雞冠花或曰貼肉汗衫二人特往請益問曰承聞和尚有三種色語是否眼曰是師曰鷄子過新羅便歸衆時李王在座下不肯乃白法眼曰寡人來日致茶筵請二人重新問話明日茶罷備絲一箱劍一口謂二師曰上座若問話得是奉賞雜絲一箱若問不得祇賜一劍法

眼陞座師復出問今日奉敕問話師還許也無眼曰許曰鷄子過新羅捧綵便行大衆一時散去時法燈作維那乃鳴鐘集衆僧堂前勘師衆集燈問承聞二上座久在雲門有甚奇特因緣舉一兩則來商量看師曰古人道白鷺下田千點雪黃鸝上樹一枝花維那作麼生商量燈擬議師打一座具便歸衆師同明和尚到淮河見人牽網有魚從網透出師曰明兄俊哉一似箇衲僧相似明曰雖然如此爭如當初不撞入網羅好師曰明兄你欠悟在明至中夜方省

隨州雙泉郁禪師僧問如何是第一句師曰回頭終不顧曰如何是第二句師曰未語先分付曰如何是第三句師曰連根猶帶苦上堂初祖不虛傳二祖不虛受彼彼大丈夫因甚麼到恁麼地便下座後住舒州海會僧問如何是舒州境師曰泥人直流山露骨曰如何是境中人師曰地有毒蛇沙有虱

韶州披雲智寂禪師僧問如何是披雲境師曰白日沒閑人問如何是不遷義師曰山高不礙白雲飛問以字不成八字不是未審是甚麼字師曰聽老僧一偈以字不是八不成森羅萬象此中明直饒巧說千般妙不是謳阿不是經問如何是色空師曰拾取落花生舊枝問如何是一塵師曰滿目是青山問如何是毗盧藏中有大經卷師曰拈不得曰為甚拈不得師曰特地却成愁

韶州舜峰義韶禪師僧問正法無言時如何師曰言曰學人不曾乞師端的師曰兩重公案曰豈無方便師曰無禮難容問祖意教意是同是別師曰日出東方月落西僧正到方丈曰方丈得恁麼黑師曰老鼠窟正曰放猫兒入好師曰試放看正無對師拊掌笑師與老宿渡江次師取錢與渡子宿曰囊中若有青銅片師揖曰長老莫笑

南嶽般若寺啓柔禪師僧問西天以蠅人為驗此土如何師曰新羅人草鞋問如何是千聖同歸底道理師曰未達苦空境無人歎嗟上堂衆聞板聲集師因示偈曰妙哉三下板知識盡來參既善分時節吾今不再三便下座

潞府妙勝臻禪師僧問金粟如來為甚麼却降釋迦會裏師曰香山南雪山北曰南贍部洲事又作麼生師曰黃河水急浪花麤問如何是向上一路師曰一條濟水貫新羅

饒州薦福承古禪師操行高潔稟性虛明叅大光敬玄禪師乃曰祇是箇草裏漢遂叅福嚴雅和尚又曰祇是箇脫灑衲僧由是終日默然深究先德洪規一日覽雲門語忽然發悟自此韜藏不求名聞棲止雲居弘覺禪師塔所四方學者奔湊因稱古塔主也景祐四年范公仲淹出守鄱陽聞師道德請居薦福開闡宗風僧問大善知識將何為人師曰莫曰恁麼則有問有答

去也師曰莫問青青翠竹盡是真如鬱鬱黃花無非般若如何是般若師曰黃泉無老少曰春來草自青師曰聲名不朽曰若然者碧眼胡僧也皺眉師曰退後三步僧曰苦師乃咩咩問臨濟舉拂學人舉拳是同是別師曰訛言亂衆曰恁麼則依令而行也師曰天涯海角問一喝分賓主照用一時行此意如何師曰乾柴濕艾僧便喝師曰紅燄炎天上堂夫出家者為無為法無為法中無利益無功德近來出家人貪著福慧與道全乖若為福慧須至明心若要達道無汝用心處所以常勸諸人莫學佛法但自休心利根者畫時解脫鈍根者或三五年遠不過十年若不悟去老僧與你入拔舌地獄叅

金陵清涼智明禪師江南主請師上堂小長老問凡有言句盡落方便不落方便請師速道師曰國主在此不敢無禮

潭州南臺道遵法雲禪師上堂從上宗乘合作麼生綱合作

麼生言論佛法兩字當得麼真如解脫當得麼雖然如是細不通風大通車馬若約理化門中一言纔啓震動乾坤山河大地海晏河清三世諸佛說法現前於此明得古佛殿前同登彼岸無事珍重問如何是祖師西來意師曰下坡不走問牛頭未見四祖時如何師曰著衣喫飯曰見後如何師曰鉢盂挂壁上問如何是真如含一切師曰分明曰為甚麼有利鈍師曰四天打鼓樓上擊鐘問如何是南臺境師曰金剛手指天問如何是色空師曰道士著真紅問十二時中時時不離時如何師曰諦韶州雙峰竟欽禪師益州人也開堂日雲門和尚躬臨證明僧問如何是佛法大意師曰日出方知天下朗無油那點佛前燈問如何是雙峰境師曰夜聽水流庵後竹晝看雲起面前山問如何是和尚為人一句師曰因風吹火上堂進一步則迷理退一步則失事饒你一向兀然去又同無情僧問如何得不同無

情去師曰動轉施爲曰如何得不迷理失事去師曰進一步退一步僧作禮師曰向來有人恁麼會老僧不肯伊曰請師直指便打出問如何是正法眼師曰山河大地問如何是法王劍師曰鉞刀徒逞不若龍泉曰用者如何師曰藏鋒猶不許露刃更何堪問賓頭盧應供四天下還得徧也無師曰如月入水問如何是用而不雜師曰明月堂前垂玉露水晶殿裏璨真珠有行者問某甲遇賊來時若殺即違佛教不殺又違王敕未審師意如何師曰官不容針私通車馬廣主嘗親問法要錫慧真廣悟號將示寂告門人曰吾不久去世汝可就山頂預修墳塔泊工畢以聞師曰後日子時行矣及期會雲門爽和尚等七人夜話侍者報三更也師索香焚之合掌而逝

韶州資福詮禪師僧問不問宗乘請師心印師曰不答這話曰爲甚麼不答師曰不副前言問覲面難逢處如何顧鑒嘆之師垂半偈免使後人疑師曰鋒前一句超調御擬問如何歷劫違曰恁麼則東山西嶺時人知有未審資福庭前誰家風月師曰且領前話

廣州黃雲元禪師初開堂日以手拊編牀曰諸人還識廣大須彌之座也無若不識老僧陞座去也師便坐僧問如何是大漢國境師曰歌謠蒲路上堂堂古人道觸目未曾無臨機何不道山僧即不然觸目未曾無臨機道甚麼珍重

廣州龍境倫禪師開堂陞座提起拂子曰還會麼若會頭上更增頭若不會斷頭取活僧問如何是龍境家風師曰豺狼虎豹問如何是佛師曰勤耕田曰學人不會師曰早收禾問僧甚麼處來曰黃雲來師曰作麼生是黃雲郎當媚凝抹躑爲人一句僧無對示衆曰作麼生是長連牀上取性一句道將來

韶州雲門山靈禪師上堂僧問如何是佛師曰聖躬萬歲問如

何是遠法身有師曰銀香臺上生蘿蔔

韶州白雲蘭禪師上堂良久僧出問白雲一路全因今日師曰
不是不是自和尙又如何師曰白雲一路草深一丈便下座問
擬伸一問師還答否師曰皂莢樹頭懸風吹曲不成問受施主
供養將何報合師曰作牛作馬

韶州淨法禪想草禪師廣主問如何是禪師乃良久主罔測因
著其號僧問日月重明時如何師曰日月雖明不鑿覆盆之下
問既是金山爲甚麼鑿石師曰金山鑿石問如何是道師曰迢
迢十萬餘

韶州溫門山蒲禪師僧問如何是佛師曰曾題卍字曰如何是
祖師曰不遊西土有人指壁上畫問既是千尺松爲甚麼却在
屋下師曰芥子納須彌作麼生問隔牆見角便知是牛時如何
師便打問如何是和尙家風師曰汝曾讀書麼問太子初生爲

不識父母師曰迥然尊貴

英州大容謹禪師僧問如何是大容水師曰還我一滴來問當
來彌勒下生時如何師曰慈氏宮中三春草問如何是真空師
曰拈却拒陽著曰如何是妙用師乃握拳僧曰真空妙用相去
幾何師以手撥之問長蛇偃月即不問匹馬單槍時如何師曰
麻江橋下會麼曰不會師曰聖壽寺前問既是真空爲甚麼趁
出僧師曰大海不容塵小溪多搯拵問如何是古佛一路師指
地僧曰不問這箇師曰去師與一老宿相期他往偶因事不去
宿曰佛無二言師曰法無一向

廣州羅山崇禪師僧問如何是大漢國境師曰玉狗吠時天未
曉金雞啼處五更初問丹霞訪居士女子不攜籃時如何師曰
也要到這裏一轉問如何是羅山境師曰布水千尋

韶州雲門常寶禪師上堂至道無難唯嫌揀擇還有揀擇者麼

時有僧問十方國土中唯有一乘法如何是一乘法師曰日月分明曰學人不會師曰清風蒲路

鄧州林路竟脫禪師僧問如何是法身師曰四海五湖賓曰如何是透法身句師曰明眼人笑汝問如何是本來入師曰風吹蒲面塵問牛頭未見四祖時如何師曰富貴多賓客曰見後如何師曰貧窮絕往還問如何是佛師曰十字路頭曰如何是法師曰三家村裏曰佛之與法是一是二師曰露柱渡三江猶懷感恨長問如何是無縫塔師曰復州城曰如何是塔中人師曰龍興寺

韶州廣悟禪師僧問如何是和尚為人一句師曰因風吹火廣州華嚴慧禪師僧問承古有言妄心無處即菩提正當妄時還有菩提也無師曰來音已照曰不會師曰妄心無處即菩提韶州長樂山政禪師僧問祖師心印何人提掇師曰石父妙手

在曰學人還有分也無師曰木人整不齊

英州觀音和尚因穿井次僧問井深多少師曰沒汝鼻孔問牛頭未見四祖時如何師曰英州觀音曰見後如何師曰英州觀音問如何是觀音妙智力師曰風射破牕鳴

韶州林泉和尚僧問如何是林泉主師曰巖下白石曰如何是林泉家風師曰迎賓待客問如何是道師曰迢迢曰便恁麼領會時如何師曰父父忘緣者寧懷去住情

韶州雲門照禪師僧問如何是祖師西來意師曰即今是甚麼意僧曰恰是師便喝

瑞州黃檗法濟禪師僧問如何是和尚家風師曰與天下人作榜樣問如何是佛師曰眉纒眼大上堂良久曰若識得黃檗帳子平生行脚事畢珍重

信州康國耀禪師僧問文殊與維摩對談何事師曰汝向鬪體

後會始得曰古人道髑髏裏薦取又如何師曰汝還薦得麼曰
恁麼則遠人得遇於師去也師曰莫謾語

潭州谷山豐禪師僧問師唱誰家曲宗風嗣阿誰師曰雪嶺梅
花綻雲洞老僧驚上堂駁馬機前異遊人肘後懸旣參雲外客
試爲老僧看時有僧纔出師便打曰何不早出頭來便下座
穎州羅漢正果禪師僧問如何是吹毛劍師曰了問和尚百年
後忽有人問向甚麼處去如何訓對師曰久後遇作家分明舉
似曰誰是知音者師曰知音者即不恁麼問問鑿壁偷光時如
何師曰錯曰爭奈苦志專心師曰錯錯

鼎州滄谿璘禪師僧問是法住法位出間相常住雲門和尚向
甚麼處去也師曰見麼曰錯師曰錯錯問如何是西來意師曰
不錯師因事示頌曰天地之前徑時人莫彊移箇中生解會眉
上更安眉

瑞州洞山清稟禪師泉州李氏子參雲門門問今日離世幾日
慧林門舉拄杖曰慧林大師恁麼去汝見麼曰深領此問門頷
左右微笑而已師自此入室印悟金陵主請居光睦未幾命入
澄心堂集諸方語要經十稔迎住洞山開堂日維那白槌曰法
筵龍象衆皆觀第一義師曰好箇消息祇恐錯會時有僧問雲
門一曲師親唱今日新豐事若何師曰也要道却

蘄州北禪悟通寂禪師上堂拈拄杖曰過去未來現在三世諸
佛微塵菩薩一時在拄杖頭上轉大法輪盡向諸人鼻孔裏過
還見麼若目與我拈將來若不見大似立地死漢良久曰風恬
浪靜不如歸堂問僧甚處來曰黃州師曰夏在甚處曰資福師
曰福將何資曰兩重公案師曰爭奈在北禪手裏曰在手裏即
收取師便打僧不甘師隨後趁出問如何是佛師曰對面千里
廬州南天王永平禪師僧問如何是西來意師曰不撒沙問如

何是南天王境師曰一任觀看曰如何是境中人師曰且領前話問又戰沙場爲甚麼功名不就師曰祇爲眠霜卧雪深曰恁麼則罷息干戈束手歸朝去也師曰指揮使未到你在

湖南永安朗禪師僧問如何是洞陽家風師曰入門便見曰如何是入門便見師曰客是主人相師問如何是至極之談師曰愛別離苦

湖南湘潭明照禪師僧問如何是湘潭境師曰山連大嶽水接瀟湘曰如何是境中人師曰便合知時問如何是佛法大意師曰百惑謾勞神

西川青城大面山乘禪師僧問如何是相輪峰師曰直聳煙嵐際曰向上事如何師曰入地三尺五問如何是佛法大意師曰興義門前數數鼓曰學人不會師曰朝打三千暮打八百

興元府普通剎禪師僧問今日一會何似靈山師曰震動乾坤問如何是普通境師曰庭前有竹三冬秀戶內無燈午夜明

韶州燈峰淨源真禪師上堂古人道山河大地普真如大眾若得真如即隱却山河大地若不得即違古人至言衆中道得者出來道看若道不得不如各自歸堂珍重僧問達磨未來時如何師曰三家村裏兩兩三三曰來後如何師曰千斜不如一直

問諸法寂滅相即不問如何是世間相師曰真不掩假問如何是和尚爲人一句師曰不著力

韶州大梵圓禪師因見聖僧乃問僧此箇聖僧年多少僧曰恰共和尚同年師喝曰這竭斗不易道得

澧州藥山圓光禪師僧問藥嶠燈聯師當第幾師曰相逢盡道休官去林下何曾見一人問水陸不涉者師還接否師曰蘇嚕蘇嚕師問新到南來北來曰北來師曰不落言詮速道速道曰某甲是福建道人善會鄉談師曰叅衆去僧曰灼然師曰更踣

跳便打問如何是祖師西來意師曰道甚麼

信州鵝湖雲震禪師僧問如何是佛師曰闍黎不是問僧近離

甚處曰兩浙師曰還將得吹毛劍來否僧展兩手師曰將謂是

箇爛柯仙元來却是擣蒲漢問如何是鵝湖家風師曰客是主

人相師曰恁麼則謝師周旋去也師曰難下陳蕃之榻

廬山開先清耀禪師僧問如何是燈燈不絕師曰青楊翻透植

曰學人不會師曰無根樹下唱虛名問披雲一句師親唱長慶

今朝事若何師曰家家觀世音問如何是披雲境師曰一併淥

水安牕下便當生涯度幾秋曰如何是長慶境師曰堂裏老僧

頭雪白曰二境同歸應當別理師曰在處得人疑問古澗寒泉

誰人能到師曰乾曰恁麼則到也師曰深多少

襄州奉國清海禪師僧問青青翠竹盡是真如如何是真如師

曰點鐵成金客聞名不見形曰恁麼則禮謝去也師曰昔時妄

三今猶存問承古有云見月休觀指歸家罷問程如何是家

師曰試舉話頭看問放過即東道西說不放過怎生道師曰二

年同一春

韶州慈光禪師僧問即心即佛誘誨之言不涉前蹤如何指教

師曰東西且置南北事作麼生曰恁麼則學人罔測去也師曰

龍頭蛇尾

韶州雙峰慧真禪師僧問如何是和尚非時為人一句師曰喫

棒得也未僧禮拜師便打

潭州保安師密禪師僧問輓芥投針時如何師曰落在甚麼處

在汝眼裏問不犯詞鋒時如何師曰天台南嶽曰便恁麼去時

如何師曰江西湖南

韶州雲門法球禪師僧問如何是西來大道師曰當時妄想至

今不絕問如何是雲門劍師曰長空不匣鋒銜色曰用者又如

何師曰四海唯清日月明問如何是道師曰頭上脚下曰如何是道中人師曰一任東西問如何是隨色摩尼珠師曰色即下無作麼生是珠曰學人不會特伸請益師曰雲有出山勢水無投澗聲問牛頭未見四祖時如何師曰香風吹萎花曰見後如何師曰更雨新好者

韶州佛陀山遠禪師僧問如何是佛師曰銅頭鐵額曰意旨如何師曰歛土颺塵

連州慈雲山深禪師僧問寶鏡當軒時如何師曰天地皆失色問如何是教外別傳一句師曰扣牙恐驚齒

廬山化城鑒禪師僧問如何是和尚正法眼師曰新羅人迷路上堂十方薄伽梵一路涅槃門諸禪德且作麼生是涅槃門莫是山僧這裏聚會少時便為涅槃門麼莫錯會好諸禪德恁不恁麼會莫別有商量底麼山僧這裏早是事不獲已向諸人恁

麼道已是相鈍置了也更擬踏步向前有何所益諸禪德但自無事自然安樂任運天真隨緣自在莫用巡他門戶求覓解會記憶在心被他繫縛不得自在便被生死之所拘何時得出頭可惜光陰倏忽便是來生速須努力時有僧問生死到來如何免得師曰柴鳴竹爆驚人耳曰學人不會請師直指師曰家犬聲啼夜不休問如何是菩提路師曰月照蒼苔深問如何是和尚家風師曰不欲說似人曰為甚麼却如此師曰家醜不外揚問如何是和尚尋常為人底句師曰量才補職曰恁麼則學人無分也師曰心不負人問佛法畢竟成得甚麼邊事師曰好箇問頭無人答得曰和尚豈無方便師曰雲有出山勢水無投澗聲問如何是向上關挨子師曰拔劍攪龍門

廬山護國和尚上堂曰有解問話者麼出來對眾問看時有僧出禮拜師曰來朝更獻楚王看便歸方丈上堂尋實際理地不受

一塵佛事門中不捨一法又曰一法若有毗盧墮在凡夫萬法若無普賢失其境界諸上座作麼生理論朝夕恁麼上來向諸上座說箇甚麼即得若說三乘十二分教自有座主律師若說世諦因緣又非僧家之所議若論佛法從上祖宗多少佛法可與評量揔不如是須知各各當人分上事作麼生是諸上座分上事知有底對衆吐露箇消息以表平生行脚叅善知識具爍迦羅日不被人謾豈不快哉還有麼良政若無人出頭買賣不貴價徒勞更商量珍重僧問佛未出世時如何師曰雲遮海門樹曰出世後如何師曰壁破鐵圍山

廬州天王徽禪師僧問如何是一大藏教師曰高座不曾登曰登後如何師曰三段不同今當第一向下文長付在來日東家壁自己分上又作麼生僧無對師便打問如何師曰天晴下師曰風雨順時曰如何是從地湧出師曰稻麻

廬州慶雲和尚僧問三乘十二分教即不問如何是直截如何師曰十進九退曰如何即是師曰何日得休時問一言道斷如何師曰未是極則處曰如何是極則處師曰冬後一陽生問諸法實相義和尚如何說師曰口挂東壁上問佛令祖令今已委向上機鋒事若何師曰今日學人不曉如何指示師曰收岳州永福院朗禪師問僧汝是甚處人曰荆南人師曰過過公安渡也無曰過公安渡師曰汝何不判公驗曰和尚何得特地師曰爭奈岳陽關頭何僧無語師便打

鄂州芭蕉山弘義禪師僧問如何是最初一句師曰舉起分明曰如何受持師曰蘇嚕悉哩問學人非時上來乞師一接師曰汝是甚處人曰河北人師曰不易過黃河

鄂州趙橫山和尚僧問十二時中如何用心師曰長連牀上喫粥喫飯問如何是諸佛師曰平地看高

信州西禪欽禪師僧問如何是函蓋乾坤句師曰天上有星皆拱北曰如何是截斷衆流句師曰大地坦然平曰如何是隨波逐浪句師曰春生夏長問古殿重興時如何師曰一回春到一回新

廬州南天王海禪師僧問如何是一體真如師曰五郎手裏鐵彈子問十度發言九度休時如何師曰口邊生荆棘曰如何免得此過師曰半路好抽身

桂州覺華普照禪師僧問大千世界爲甚麼轉身不得師曰誰礙闍黎曰爭奈轉不得師曰無用處問聲色二字如何透得師曰虛空無變易日月自紛拏問如何是真如涅槃師曰秋風聲颯颯澗水響潺潺上堂總似今日老胡有望然燈佛不如闍黎總似今日老胡絕望闍黎不如然燈佛於此明得大地微塵諸佛西天二十八祖唐土六祖天下老宿一時拈來山僧拄杖頭

上轉妙法輪於此明不得百千諸佛穿你鼻孔西天二十八祖透過你觸髅還知麼若不知山僧與你指出良久曰山河大地有甚麼過久立珍重

益州鐵幢覺禪師僧問十二時中如何履踐師曰光剃頭淨洗鉢問如何是道師曰踏著曰如何是道中人師曰退後三步問諸佛出世當爲何事師曰截耳卧街

新州延長山和尚後住龍景山真身現在僧問如何是和尚家風師曰醜拙不可當曰客來如何祇待師曰无益竹筋問從上古聖向甚麼處去師曰不在山間即居樹下曰未審成得箇甚麼師曰汝還知落處麼僧無語師便打

眉州福化充禪師僧問如何是大人相師曰山僧這裏不曾容易對闍黎曰如何得相承去師曰白雲雖有影綠竹且無陰問天皇也恁麼道龍潭也恁麼道未審和尚作麼生道師曰汝試

道看曰比來請益豈無方便師曰將謂是海東舶主元來是北地番人問如何是佛法大意師曰十字路頭華表柱曰學人不曾乞師再指師曰君自行東我向西

眉州黃龍贊禪師僧問如何是和尚閑梭子師曰少人踏得著曰忽踏得著時如何師曰汝試進前看僧便喝師便打問僧近離甚處曰香林師曰在彼多少時曰六年師曰世尊在雪山六年證無上菩提汝在香林六年成得箇甚麼僧無語師曰移厨喫飯漢

衡州大聖院守賢禪師僧問如何是古佛道場師曰五通廟裏沒香爐問如何是佛法大意師曰南斗七北斗八

舒州天柱山和尚上堂曰莫有作家戰將麼試出來與山僧相見時有僧出禮拜師曰山僧打退鼓曰和尚是甚麼心行師曰敗將不戰問北斗藏身意旨如何師曰闍黎豈不是荆南人目

是師曰祇見波瀾不見測人深

韶州雲門山即上座自幼肄業講肆聞僧問雲門如何是透法身句門曰北斗裏藏身師罔測微旨遂造雲門門緣見便把住曰道道師擬議門拓開乃示頌曰雲門聳峻白雲低水急遊魚不敢棲入戶已知來見解何愁再舉轆中泥師因斯大悟即便禮拜自此依雲門為上座僧問如何是解脫師曰穿靴水上行問如何是透脫一路師曰南贍部洲北鬱單越曰學人不會意旨如何師曰朝遊羅浮暮歸檀特

鄆州纂子山庵主僧問如何是透法身句師曰朝看東南暮看西北

青原下八世

白雲祥禪師法嗣

韶州大歷和尚初參白雲雲舉拳曰我近來不恁麼也師頷首

禮拜自此入室住後僧問如何是西來意師曰破草鞋問如何是無爲師乃擺手問施主供養將何報答師以手撚髭曰有髭即撚無髭又如何師曰非公境界

連州寶華和尚上堂看天看地新羅國裏和南不審日銷萬兩黃金雖然如此猶是少分又曰盡十方世界是箇木羅漢幡竿頭上道將一句來又曰六上龍飛鳳走山間虎嘯猿啼拈向鼻孔道將一句來問僧甚處來曰大容來師曰大容近日作麼生曰近來合得一甕醬師喚沙彌將一碗水來與這僧照影因有僧問大容曰天賜六銖披挂後將何報答我皇恩容曰來披三事柄歸挂六銖衣師聞之乃曰這老凍驢作恁麼語話容聞令人傳語曰何似奴緣不斷師曰此爲拋軌祇圖引玉師見一僧從法堂階下過師乃敲繩牀僧曰若是這箇不請拈出師喜下地詰之僧無語師以打師有時戴冠子謂衆曰若道是俗日身披袈裟若道是僧又頭戴冠子衆無對

韶州月華山月禪師初謁白雲雲問業箇甚麼曰念孔雀經雲曰好箇人家男女隨鳥雀後走師聞語驚異遂依附久之乃契旨尋住月蓋于僧問如何是月華家風師曰若問家風即答家風曰學人問家風師曰金銅羅漢上堂舉一句語爲大千界還有人會得這箇四時節麼試出來道看要知親切良久曰不出頭是好手又立珍重僧問如何是祖師西來師曰梁王不識曰意旨如何師曰隗公履西歸師入京上堂有一官人出禮拜起低頭良久師曰掣電之機徒勞佇思有一老宿上法堂東西顧視曰好箇法堂要曰無主師聞乃召曰且坐喫茶宿問曰玄中長的猶是龜毛兔角不向二諦中修如何密用師曰側宿曰恁麼則拗折拄杖割斷草鞋去也師曰細而詳之

南雄州地藏和尚上堂僧問今日供養地藏地藏還來否師曰

打開佛殿門裝香換水師與大容和尚在白雲開火路容曰三
道寶塔何以箇火路師曰甚麼處不是

英州樂淨含匡禪師上堂良久曰摩竭提國親行此令去却擔
簦截流相見僧問如何是西來意師曰側耳無功問如何是樂
淨家風師曰天地養人問如何是樂淨境師曰有工貪種竹無
暇不栽松曰忽遇客來將何供養師曰滿園秋果熟要者近前
嘗問龍門有意透者如何師曰灘下接取曰學人不會師曰喚
行頭來問但得本莫愁末如何是本師曰不要問人曰如何是
末師乃豎指如何是樂淨境師曰滿月團圓菩薩面庭前樓
樹夜叉頭僧辭師問甚處去曰大容去師曰大容若問樂淨有
何言教汝作麼生祇對僧無語師代云但道樂淨近日不肯大
容因普請打鐘次僧問古人種種開方便門和尚為甚麼却攔
截師曰牢下懶著

韶州後白雲和尚僧問古琴絕韻請師彈師曰伯牙雖妙手時
人聽者希曰恁麼則再遇子期也師曰笑發驚絃斷寧知調不
同問昔日靈山一會梵王為主未審白雲甚麼人為主師曰有
常侍在曰恁麼則法雨霽麗群生有賴師曰汝莫這裏賣梳子
韶州白雲禪師僧問如何是佛法的的之意師曰直曰學人
不會意旨如何師曰崖州路上問知音

德山密禪師法嗣

鼎州文殊應真禪師上堂直釣鯨龍曲釣蝦蟆蚯蚓還有
龍麼良久曰勞而無功僧問寶劍未出匣時如何師曰在甚麼
處曰出匣後如何師曰臂長衫袖短問古人拊掌意旨如何師
曰家無小使不成君子

南嶽南臺勤禪師僧問如何是祖師西來意師曰一寸龜毛重
七斤

鼎州德山紹晏禪師僧問如何是祖師西來意師曰桃源水遶白雲亭上堂一塵繞起大地全收一毛頭上師子全身且道一塵繞起大地全收須彌山重多少一毛頭上師子全身大海水有幾滴有人道得與汝拄杖子天下橫行若道不得須彌山蓋却汝頭大海水溺却汝身

潭州鹿苑文襲禪師僧問遠遠投師請師一接師曰五門巷裏無消息僧曰久師曰會麼曰不會師曰長樂坡頭信不通

澧州藥山可瓊禪師上堂僧出曰請師答話師曰好曰還當得也無師曰更問問巨嶽不曾乏寸土師曰今苦口為何人師曰延壽也要道過之曰不伸此問焉辨我師師便喝僧禮拜師便打

巴陵乾明院普禪師僧問萬行齊修古人不許不落功勳還許也無師曰一曰學人未曉乞師再指師曰三十年後

興元府中梁止崇禪師僧問垂絲千尺意在深潭時如何師曰

欲學上躑

鼎州黃龍志原禪師僧問迦葉上行衣何人合得披師曰一片燒痕地春入又逢青

益州東禪秀禪師僧問既是善神為甚麼却被雷打師曰世亂奴欺主年衰鬼弄人問如何是一代時教師曰多年故紙

鼎州普安道禪師三句頌函蓋乾坤曰乾坤并萬象地獄及天堂物物皆真見頭頭用不傷截斷衆流曰堆山積嶽來一一盡塵埃更擬論玄妙冰消瓦解摧隨波逐浪曰辯口利舌問高低總不虧還如應病藥診候在臨時三句外曰當人如舉唱三句豈能該有問如何事南嶽與天台搆薦商量曰相見不揚眉君東我亦西紅霞穿碧落白日繞須彌

巴陵鑿禪師法嗣

泐潭靈澄散聖因智明寬禪師問曰甚處來師曰水清月現門

曰好好借問師曰褊衫不染皂門曰喫茶去師有西來意頌曰
因僧問我西來意我話居山七八年草屣屣栽三箇耳麻衣曾
補兩番肩東庵每見西庵雪下澗長流上澗身半夜白雲消散
後一輪明月到牀前

襄州興化院興順禪師僧問如何是和尚深深處師曰舉即易
荅即難曰爲甚麼如此師曰過去問如何是百千妙門同歸方
寸師曰水底看夜市問如何是向上事師曰楚山頭指天
雙泉寬禪師法嗣

蘄州五祖師戒禪師僧問如何是佛師曰鼻孔長三尺曰學人
不會師曰真不掩偽曲不藏直問如何是道師曰點曰點後如
何師曰荆三汴四問寶劍未出匣時如何師曰看日出匣後如
何師曰收問如何是隨色塵尼珠師曰隨曰隨後如何師曰一
箇波瀾箇瘦問得船便渡時如何師曰掉在誰人手僧

師曰雲有出山勢水無投澗聲上堂佛病祖病一時與諸禪德
拈向三門外諸禪德還拈得山僧病也無若拈得山僧病不妨
見得佛病祖病珍重問如何是祖師西來意師曰擔不起曰爲
甚麼擔不起師曰祖師西來意問牛頭未見四祖時如何師曰
高問低對曰見後如何師曰風蕭蕭兩颯颯上堂僧問名喧宇
宙知師久雪嶺家風略借看師曰未在更道僧展兩手師便打
僧禮拜師豎起拄杖曰大衆會麼言不再舉今不重行使下座
問僧近離甚處曰東京師曰還見天子也無曰常年一度出金
明池師曰有禮可恕無禮難容出去智門問曰暑往寒來即不
問林下相逢事若何師曰五鳳樓前聽玉漏門曰爭奈主山高
案山低師曰須彌頂上擊金鐘

江陵府福昌院重善禪師僧問如何是正法眼師曰夜觀乾象
曰學人不會意旨如何師曰日裏看山問如何是佛法的大

意師曰東方甲乙木曰恁麼則粉骨碎身也師曰易開終始口
難保歲寒心問浩浩塵中如何辨主師曰長安天子塞外將軍
曰恁麼則權握在手師曰不斬無罪人問如何是不遷底法師
曰死人不坐禪曰學人不會意旨如何師曰那伽常在定問離
却咽喉唇吻請師速道師曰福昌口門窄曰和尚為甚麼口門
窄師曰還我話來問如何是離 蹄底句師曰頭大帽子小曰
意旨如何師曰側脚反穿靴問金烏東涌玉兔西沉時如何師
曰措大不騎驢曰恁麼則謝師指南師曰更須子細問牛頭未
見四祖時如何師曰樵子數珠曰見後如何師曰鐵磬行者問
未施武藝便入戰場時如何師曰老僧打退鼓曰恁麼則展陣
開旗去也師曰伏惟尚饗上堂盡乾坤大地微塵諸佛總在福
昌這裏拈拄杖畫一畫曰說佛法諸禪德若也會得出來與
汝證據若也不會花須連夜發莫待曉風吹便下座

蘄州四祖志誣禪師僧問如何是透法身句師曰多年松樹老
粼皴閑葉落歸根時如何師曰一歲一枯榮

襄州興化奉能禪師僧問如何是佛師曰長僧貌醜

唐州天睦山慧滿禪師僧問如何是佛師曰三桃核口音旨

如何師曰打破裏頭人問如何是祖師西來意師曰三在逢一

問曰合談何事師曰九日是重陽

鄂州建福智同禪師僧問如何是透法身句師曰鸚鵡慕西秦

僧禮拜師曰聽取一頌雲門透法身法身何許人鴈回沙塞北

鸚鵡慕西秦

襄州延慶宗本禪師僧問魚未跳龍門時如何師曰擺手入長

安曰跳過後如何師曰長安雖樂

鼎州大龍山炳賢禪師僧問昔日先師語如何透法身師曰萬

仞峰前句不與白雲齊問如何是動乾坤句師曰透出龍宮翻

命歟虛踏破草鞋鬧羅王徵你草鞋錢有口在上堂雪峰輓毬
羅漢書字歸宗斬蛇大隨燒畚且道明其甚麼邊事還有人明得
麼試道看若明不得所以道斬蛇須是斬蛇手燒畚須是燒畚
人瞥起情塵生妄見眼裏無筋一世貧上堂赫日裏我人雲霧
裏慈悲霜雪裏假褐電子裏藏身還藏得自麼若藏不得却被
電子打破觸髓上堂東家李四婆西家來乞火門外立少時嗔
他停滯我惡發走歸家虛心屋裏坐可憐羣小兒終日受饑餓
有眼不點睛空鏤觸髓破

灌州羅漢和尚僧問如何是佛師曰牛頭阿旁曰如何是法師
曰劍樹刀山問如何是佛法大意師曰井中紅燄日裏浮漚曰
如何領會師曰遙指扶桑日那邊問如何是本來心師曰蹉過
了也

灌州青城香林信禪師僧問覲面相見時如何師曰築著鼻孔
洞山初禪師法嗣

潭州福嚴良雅禪師居洞山第一座山叅次僧出問如何是佛
山荅曰麻三斤叅罷山至寮謂師曰我今日荅這僧話得麼曰
恰值其淨髮山曰你元來作這去就拂袖便出師曰這老漢將
謂我明他這話頭不得因作偈呈曰五彩畫牛頭黃金爲點額
春晴二月初農人皆取則寒食賀新正鐵錢三五百山見深肯
之住福嚴日僧問如何是和尚家風師曰入門便見

荆南府開福德賢禪師僧問去離不得時如何師曰子承父業
問如何是衲僧活計師曰耳裏種田上堂不用思而知不用慮
而解知解俱泯合談何事良久曰一葉落天下秋問承和尚有
言隔江招手意旨如何師曰被裏張帆曰恁麼則南山起雲北
山下雨去也師曰踏不著

潭州報慈嵩禪師僧問北斗藏身意旨如何師曰百歲老人入

漆甕

岳州乳明睦禪師問洞山停機罷賞時如何山曰水底弄傀儡師曰誰是看翫者山曰停機罷賞者師曰恁麼則知音不和也山曰知音底事作麼生師曰大盡三十日山曰未得更道師曰某甲合喫和尚手中痛棒山休去問昔日靈山記今朝嗣阿誰師曰楚山突兀漢水東流曰恁麼則洞山的嗣也師曰聽事不真喚鐘作甕

鄧州廣濟院同禪師僧問萬緣息盡時如何師曰三脚蝦蟆飛上天問如何是透法身句師曰華嶽三峰小曰此意如何師曰黃河輓底流

韶州東平山洪教禪師僧問如何是向上關師豎起拂子僧曰學人未曉乞師再指師曰非公境界曰和尚豈無方便師曰再犯不容

泐潭謙禪師法嗣

虔州丫山宗盛禪師上堂鐘聲清鼓聲響早晚相聞休妄想焉得徒勞別問津莫道山僧無伎倆咄
奉先深禪師法嗣

天台蓮華峰祥庵主僧問如何是雪嶺泥牛吼師曰聽曰如何是雲門木馬嘶師曰響示寂日拈拄杖示衆曰古人到這裏爲甚麼不肯住衆無對師乃曰爲他途路不得力復曰畢竟如何以杖橫肩曰柳栗橫擔不顧人直入千峰萬峰去言畢而逝
江州崇勝御禪師僧問如何是學人受用三昧師曰橫擔拄杖曰意旨如何師曰步步踏實

雙泉郁禪師法嗣

鼎州德山慧遠禪師開堂示衆曰無量法門悉已具足然雖如是且須委悉始得其餘方便昔時聖人互出乃曰傳燈爾後賢

者差有故云繼祖是以心心相傳法法相印且作麼生傳作麼生印舉起拂子曰此乃人天同證若如是也遞相證明其或未曉之徒請垂下問僧問如何是祖師西來意師曰鐵門路險解夏上堂僧問九旬禁足今已滿自恣之儀事若何師曰猢猻趁蛺蝶九步作一歇曰意旨如何師示頌曰兩箇童兒弄木鼓左邊打了右邊舞刹那變現百千般分明示君君記取問立偈遷化向甚麼處去師曰烏龜鑽破壁上堂枕石漱流任運吞具不見古者道撥霞掃雪和雲母掘石移松得茯苓當恁麼時復何言哉諸禪德要會麼聽取一頌雪霽長空迴野飛鴻段雲片片向西向東

襄州含珠山彬禪師僧問如何是正法眼師曰瞎問如何是和尚關挨子師豎起拂子僧便喝師便打問如何是三乘教師曰上大人曰意旨如何師曰化三千

拔禪師法嗣

廬山開先照禪師僧問向上宗乘乞師垂示師曰白雲斷處見明月曰猶是學人疑處師曰黃葉落時聞擣衣問如何是和尚家風師曰一條寒澗木得力勝兒孫曰用者如何師曰百雜碎上堂叢林規矩古佛家風一叅一請一粥一飯曰道明得箇甚麼抵如諸人心心不停念念不住若能不停處但念念無念自合無生之理與麼說話笑破他人口叅

金陵天寶和尚僧問白雲抱幽石時如何師曰非公境界問如何是和尚家風師曰列半作三曰學人未曉師曰鼻孔針筒舜峰韶禪師法嗣

磁州桃園山曦朗禪師僧問如何是祖師西來音師曰西來若有意斬下老僧頭曰爲甚却如此師曰不見道爲法喪軀安州法雲智善禪師僧問如何是古佛道場師曰山青水綠

般若柔禪師法嗣

藍田縣真禪師僧問如何是大定門師曰拈柴擻菜上堂成山假就於始篋脩途託至於初步上座適來從地爐邊來還與初步同別若言同即不會不遷若言別亦不會不遷上座作麼生會還會麼這裏不是那裏那裏不是這裏且道是一處兩處是遷不遷是來去不是來去若於此顯明得便乃古今一如初終自爾念念無常心心求滅所以道觀方知彼去去者不至方上座適來恁麼來却請恁麼去叅

妙勝臻禪師法嗣

西川雪峰欽山主上堂昨日一今日二不用思量快須瞥地不瞥地踉蹌過平生沒巴鼻咄

薦福古禪師法嗣

和州江戒守密禪師僧問如何是佛師曰稽首稽首曰學人痛

分也無師曰頓首頓首僧作舞而出師曰似則恰似是即未是清涼明禪師法嗣

吉州西峰雲豁禪師郡之曾氏子早扣諸方晚見清涼問佛未出世時如何涼曰雲遮海門樹曰出世後如何涼曰擘破鐵圍山師於言下大悟涼印可之歸住寶龍雲侶駢集 真宗皇帝

遣使召至訪問宗要留上苑經時冥坐不食上嘉 異賜號圓淨

辭歸珍錫甚隆皆不受以詩寵其行改寶龍曰祥符旌師之居

也嘗有問易中要旨者師曰夫神生於無形而成於有形從有以至於無然後能合乎妙圓正覺之道故自四十九衍以至於

萬有一千五百二十以窮天下之理以盡天下之性不異吾聖人之教也示寂日為禪曰天不高地不厚自是時人覩不透但

看臘月二十五依舊面南看北斗瞑然而逝茶毗獲設利建塔

青原下九世

文殊真禪師法嗣

瑞州洞山曉聰禪師遊方時在雲居作燈頭見僧說泗州大聖
近在揚州出現有設問曰既是泗州大聖爲甚蘇却向揚州出
現師曰君子愛財取之以道後僧舉似蓮華峰祥庵主主大驚
曰雲門兒孫猶在中夜望雲居拜之住後僧問達磨未傳心地
印釋迦未解髻中珠此時若問西來意還有西來意也無師曰
六月雨淋淋寬其萬姓心曰恁麼則雲散家家日春來處處花
師曰脚跟下到金剛水際是多少僧無語師曰祖師西來特唱
此事自是上座不薦所以從門入者不是家珍認影迷頭豈非
大錯既是祖師西來特唱此事又何必更對衆怱怱珍重問無
根樹子向甚麼處栽師曰千年常住一朝僧問如何是離聲色
句師曰南贍部洲北鬱單越曰恁麼則學人知恩不味也師曰
四大海深多小問古鏡未磨時如何師曰此去漢陽不遠曰磨

後如何師曰黃鶴樓前鸚鵡洲問如何是佛師曰理長即就上
堂教山僧道甚麼即得古即是今今即是古所以楞嚴經道松
直棘曲鶻白鳥玄還知得麼雖然如是未必是松一向直棘一
向曲鶻便白鳥便玄洞山道這裏也有曲底松也有直底棘也
有玄底鶻也有白底鳥又立上堂僧問學人進又不得退又不
得時如何師曰抱首哭蒼天僧無語師曰汝還知鉢盂鑽子落
處麼汝若知得落處也從汝問三十年後驀然問著也不定上
堂舉寒山云井底生紅塵高峰起白浪石女生石兒龜毛寸寸
長若要學菩提但看此模樣良久曰還知落處也無若也不知
落處看看菩提入僧堂裏去也又立上堂春寒凝沍夜來好雪
還見麼大地雪漫漫春風依舊寒說禪說道易成佛成祖難珍
重上堂晨雞報曉靈粥後便天明燈籠猶瞌睡露柱却惺惺復
曰惺惺直言惺惺歷歷直言歷歷明朝後日莫認奴作郎珍重

因事示衆天晴蓋却屋乘乾刈却禾早輸王稅了鼓腹唱巴歌
問德山入門便棒猶是起摸畫樣臨濟入門便喝未免捏目生
花離此二途未審洞山如何爲人師曰天晴久無雨近日有雲
騰曰他日若有人問洞山宗旨教學人如何舉似師曰園蔬枯
槁甚擔水潑菠稜師一日不安上堂辭衆述法身頌曰參禪學
道莫茫茫問透法身北斗藏余今老倒厓羸甚見人無力得商
量唯有鑿頭知我意栽松時復上金剛言訖而寂塔于金剛嶺
南臺勤禪師法嗣

德山曇禪師法嗣

汝州高陽法廣禪師僧問如何是大悲于于眼師曰墮坑落澗
潭州石霜節誠禪師僧問古者道捲簾當白晝移榻對青山如
何是捲簾當白晝師曰過淨瓶來曰如何是移榻對青山師曰
却安舊處著上堂心外無法法外無心隨緣蕩蕩更莫沉吟你
等諸人纔上塔道便好回去更待第二杓惡水潑作甚麼

德山曇禪師法嗣

鼎州德山志先禪師僧問見色便見心時如何師曰角弓彎似
月寶劍利如霜曰如何領會師曰金甲似魚鱗朱旗如火燄問
遠遠投師乞師一接師曰不接曰恁麼則虛伸一問師曰少逢
穿耳客多遇刻舟人問大迦智勝佛十劫坐道場爲甚麼不得
成佛道師曰貪觀天上月失却掌中珠問軍期急速時如何師
曰十字街頭滿面塵曰爲甚麼如此師曰知而故犯問如何是
無爲之談師曰石羊石虎喃喃語曰是何言教師曰長行書不
盡短偈絕人間問如何是一稱南無佛師曰皆以成佛道

黑水環禪師法嗣

峨嵋黑水義欽禪師上堂僧出禮拜師曰大地百雜碎便下座
五祖戒禪師法嗣

洪州泐潭懷澄禪師僧問見者是色聞者是聲離此二途請師

別道師曰古寺新牌額問不與萬法爲侶者是甚麼人師曰觀世音菩薩師一日見僧披衲師曰得恁麼好針線曰祇要牢固師曰打草驚蛇作甚麼曰客來須看師曰祇有這箇更別有曰雲生嶺上師曰未更道曰水滴巖間問如何是佛法大意師曰文殊自文殊解脫自解脫

瑞州洞山自寶禪師上堂總恁麼風恬浪靜那裏得來忽遇洪波浩渺白浪滔天當恁麼時覓箇水手也難得衆中莫有把柁者麼衆無對師曰賺殺一船人僧問如何是佛師曰腰長脚短復州北塔思廣禪師僧問如何是衲僧變通之事師曰東涌西沒曰變通後如何師曰地肥茄子嫩問如何是和尚家風師曰左手書右字曰學人不會師曰歐頭柳脚

蘄州四祖端禪師法身頌曰燈心刺著石人脚火急去請周醫情空途龐公相借問六月日頭乾曬却

潭州雲蓋志顛禪師僧問如何是祖師西來意師曰古寺碑難讀曰音旨如何師曰讀者盡攢眉

舒州海會通禪師僧問如何是佛法大意師曰桶蓋椽笠曰學人不曉師曰行時頭戴笠則挂高壁

瑞州洞山妙圓禪師僧問如何是佛師曰頭腦相似

蘄州義臺子祥禪師僧問如何是義臺境師曰路不拾遺曰如何是境中人師曰桀犬吠堯

明州天童懷清禪師僧問如何是祖師西來意師曰眼裏不著沙曰如何領會師曰耳裏不著水曰恁麼則禮拜也師曰東家點燈西家暗坐

越州寶嚴叔芝禪師僧問如何是佛師曰土身木骨曰意旨如何師曰五彩金裝曰恁麼則頂禮去也師曰天台柳栗

蘄州五祖山秀禪師僧問無法可說是名說法既是無法可說

又將何說師曰霜寒地凍小曰空生不解巖中坐惹得天花動地
來師曰日出冰消僧擬說師曰何不進語僧又無語師曰車不
橫推理無曲斷

襄州白馬辯禪師僧問如何是佛師曰水來河漲曰如何是法
師曰風來樹動

隨州水南智昱禪師上堂欲識解脫道雞鳴天已曉趙州庭前
柏打落青州棗吽

福昌善禪師法嗣

安吉州上方齊岳禪師僧問如何是菩提師曰輓頭瓦子曰意
旨如何師曰苦上堂旋收蕪葉燒青煙竹榻和衣半夜眠粥後
放參三下鼓孰能更話祖師禪便下座

明州育王常坦禪師僧問如何是有中有師曰金河峰上曰如
何是無中無師曰般若堂前上堂千花競發百鳥啼春是向上
句諸佛出世知識與慈是向下句作麼生是不涉二途句蓋識
得頂門上出氣若識不得土牛耕石三擊禪牀下座

潤州金山瑞新禪師僧問吾有大患云何有身父母未生未審
此身在甚麼處師曰曠大劫來無處云若論生滅盡成非曰恁
麼則周徧十方心不在一切處師曰泥裏撼椿上堂世間所貴
者和氏之璧隋侯之珠金山喚作驢屎不馬糞出世間所貴者真
如解脫菩提涅槃金山喚作冢沸確且道恁麼說話落在甚
麼處故不是取舍心重信邪倒見諸人要知麼猛虎不顧凡上
因洪爐豈鑄囊中錘

軋明信禪師法嗣

澧州藥山昇肅禪師僧問佛未出世時如何師曰大樹大皮裹
曰出世後如何師曰小樹小皮纏問如何是不動尊師曰四王
檯不起

智門祚禪師法嗣

明州雪竇重顯禪師遂寧府李氏子依普安院仁銑上人出家受具之後橫經講席究理窮玄詰問鋒馳機辯無敵咸知法器僉指南遊首造智門即伸問曰不起一念云何有過門召師近前師繞近前門以拂子驀口打師擬開口門又打師豁然開悟出住翠峰後遷雪竇開堂日於法座前顧視大眾曰若論本分相見不必高陞法座遂以手畫一畫曰諸人隨山僧手看無量諸佛國土一時現前各各子細觀瞻其或涯際未知不免拖泥帶水便陞座上首白椎罷有僧方出師約住曰如來正法眼藏委在今日放行則瓦礫生光把住則真金失色權柄在手殺活臨時其有作者共相證據信出問遠離翠峰祖席已臨雪竇道場未審是一是二師曰馬無千里謾追風曰恁麼則雲散家家月師曰龍頭蛇尾漢問德山臨濟棒喝已彰和尚如何為人師

曰放過一著僧擬議師便喝僧曰未審祇恁麼別有在師曰此虎不真徒勞沒羽問吹大法螺擊大法鼓朝宰臨筵如何即是師曰清風來未休曰恁麼則得過於師也師曰一言已出駟馬難追僧禮拜師曰放過一著乃普觀大眾曰人天普集合發明箇甚麼事焉可互分賓主馳騁問荅便當宗乘去廣大門風威德自在輝騰今古把定乾坤千聖祇言自知五乘莫能建立所以聲前悟旨猶迷顧鑒之端言下知宗尚昧識情之表諸人要知真實相為麼但以上無攀仰下絕已躬自然常光現前箇箇壁立千仞還辨明得也無未辨辨取未明明取既辨明得能截生死流同據佛祖位妙圓超悟正在此時堪報不報之恩以助無為之化問如何是佛法大意師曰祥雲五色曰學人不會師曰頭上漫漫問達磨未來時如何師曰猿啼古木曰來後如何師曰鶴唳青霄曰即今事作麼生師曰一不成二不是問和尚

未見智門時如何師曰爾鼻孔在我手裏曰見後如何師曰穿
過髑髏有僧出禮拜起曰請師答話師便捧僧曰豈無方便師
曰罪不重科復有一僧出禮拜起曰請師答話師曰兩重公案
曰請師不答話師亦捧問古人道北斗裏藏身意旨如何師曰
千聞不如一見曰此話大行師曰老鼠銜鐵問古人道皎皎地
絕一絲頭祇如山河大地又且如何師曰面赤不如語直曰學
人未曉師曰徧問諸方問如何是學人自己師曰乘槎斫額曰
莫祇這便是師曰浪死虛生問如何是緣生義師曰金剛鑄鐵
券曰學人不會師曰鬧市裏牌曰恁麼則行到水窮處坐看雲
起時師曰列下問四十九年說不盡底請師說師曰爭之不足
曰謝師答話師曰鐵棒自看問如何是把定乾坤眼師曰拈却
鼻孔曰學人不會師曰一喜一悲僧擬議師曰苦問如何是脫
珍御服著弊垢衣師曰垂手不垂手曰乞師方便師曰左眼挑

筋右眼抉肉問龍門爭進舉那箇是參茸師曰重遭點額曰學
人不會師曰退水藏鱗問寂寂忘言誰是得者師曰卸帽穿雲
去曰如何領會師曰披裝帶雨歸曰三十年後此話大行師曰
一場酸澁問坐斷毗盧底人師還接否師曰殷勤送別瀟湘岸
曰恁麼則學人罪過也師曰天寬地窄入愁人偕禮拜師曰苦
屈之詞不妨難吐問生死到來如何回避師曰定花板上曰莫
便是他安身立命處也無師曰符到奉行上堂僧問如何是吹
毛劔師曰苦曰還許學人用也無師嗎一瘧乃曰大衆前共相
酬唱也須是箇漢始得若也未有奔流度刃底眼不勞拈出所
以道如大火聚近著即燎却面門亦如按太阿寶劔衝前即喪
身失命乃曰太阿橫按祖堂寒千里應須息萬端莫待冷光輕
閃爍復云看看便下座上堂僧問如何是維摩一默師曰寒山
訪拾得曰恁麼則入不二之門師噓一噓復曰維摩大士去何

從千古令人望莫窮不二法門休更問夜來明月上孤峰上堂
春山疊亂青春水漾虛碧寥寥天地間獨立望何極便下座却
顧謂侍者曰適來有人看方丈麼者曰有師曰作賊人心虛上
堂十方無壁落四面亦無門古人向甚麼處見客或若道得接
手向許你天上天下上堂田地穩密底佛祖不敢近為甚麼擡
脚不起神通遊戲底鬼神不能測為甚麼下脚不得直饒十字
縱橫朝打三千暮打八百上堂大衆這一片田地分付來多時
也爾諸人四至界畔猶未識在若要中心樹子我也不惜問如
何是諸佛本源師曰千峰寒色曰未委向上更有也無師曰雨
滴巖花上堂僧問雪覆蘆花時如何師曰點曰怎麼則為祥為
瑞云也師曰兩重公案乃曰雪覆蘆花欲暮天謝家人不在漁
船白牛放却無尋處空把山重贈鐵鞭師一日遊山四顧周覽
謂侍者曰何日復來於此侍者哀乞遺偈師曰平生唯患語之

其盛沐攝衣北首而逝塔全身于寺之西塢賜明覺大師

襄州延慶山子榮禪師僧問如何是隨色摩尼珠師曰三箇童
兒弄花毬曰怎麼則終朝盡日也師曰頭白齒落上堂僧問靈
光隱隱月照寒慙善法堂前請所舉唱師曰聽曰此猶是這邊
事那邊事作麼生師曰脚下毛生問如何是佛師曰橫身彰十
號入擲示雙趺曰將何供養師曰合掌當曾問如何是祖師西
來意師曰穿耳胡僧不著鞋

洪州百丈智映寶月禪師僧問師唱誰家曲宗風嗣阿誰師曰
空堵那吒掌上擎曰怎麼則北塔的子韶石兒孫也師曰祈額
望新羅

韶州南華寶綠慈濟禪師僧問如何是祖師西來意師曰青山
綠水曰未來時還有意也無師曰高者高低者低

黃州護國院壽禪師僧問如何是一路涅槃門師曰寒松青有
千年色一徑風飄四季香問如何是靈山一會師曰如來纔一
顧迦葉便低眉

瑞州九峰勤禪師僧問方便門中請師垂示師曰佛不奪眾生
願曰恁麼則謝師方便師曰却須喫棒上堂曰羅舌洪千喚萬
喚露柱因其麼不回頭良久曰美食不中飽人喫便下座

潭州雲蓋繼鵬禪師初謁雙泉雅禪師泉令充侍者示以芭蕉
拄杖話經久無省發一日泉向火次師侍立泉忽問拄杖子話
試舉來與子商量師擬舉泉拈火筋便撼師豁然大悟住後僧
問如何是佛法大意師曰舌頭無骨問如何是祖師西來意師
曰湯瓶火裏煨問佛未出世時如何師曰天曰出世後如何師
曰地上堂高不在絕頂富不在福嚴樂不在天堂苦不在地獄
良久曰相識滿天下知心能幾人

海禪師僧問如何是黃龍家風師曰看曰忽遇寒來
如何祇待師以拄杖點之問如何是最初一句師曰掘地討天
鼎州彰法澄泗禪師僧問如何是佛法大意師曰多少人摸索
不著曰忽然摸著又作麼生師曰堪作甚麼

泉州雲臺因禪師僧問如何是和尚家風師曰嗔拳不打笑面
曰如何施設師曰天台則有南嶽則無問如何是佛師曰月不
破五曰意旨如何師曰初三十一問如何是佛法大意師曰今
日好曬麥曰意旨如何師曰問取磨頭上堂菩薩子不在內不
在外不在中間且道落在甚麼處良久曰南贍部洲北鬱單越
福嚴雅禪師法嗣

潭州北禪智賢禪師僧問如何是佛師曰匙挑不上曰如何是
道師曰嶠路如橋歲夜小參曰年窮歲盡無可與諸人分歲老
僧煮一頭露地白牛炊黍米飯煮野菜羹燒楮火大家喫了

唱村田樂何故免見倚他門戶傍他牆剛被時人喚作郎便下
座歸方丈至夜深維那入方丈問訊曰縣裏有公人到勾和尚
師曰作甚麼那曰道和尚牽牛不納皮角師逐捋下頭帽擲在
地上那便拾去師跳下禪牀攔曾擒住叫曰賊賊那將帽子覆
師頂曰天寒且還和尚師呵呵大笑那便出去時法昌為侍者
師顧昌曰這公案作麼生昌曰潭州紙貴一狀領過
南嶽衡嶽寺振禪師山居頌曰阿呵呵瘦松寒竹鎖清波有時
獨坐巖峒上無人共唱太平歌朝看白雲生洞口暮觀明月照
娑婆有人問我居山事三尺杖子攪黃河

開福賢禪師法嗣

日芳上座僧問如何是函蓋乾坤白師豎起拄杖僧曰如何是
截斷衆流白師橫按拄杖僧曰如何是隨波逐浪白師擲下拄
杖僧曰三句外請師道師便起去師贊開福真曰清儀瘦骨可

瞻可仰仰之非親妙筆圖方可擬可像像之非真非親非真秋
月盈輪有言無味若到中的既往如在若覓焉覓當機隱顯若
絲髮請訛金烏卓午若遇風雲霹靂

報慈嵩禪師法嗣

郢州興陽山遜禪師僧問如何是佛師曰髮白面皺曰如何是
法師曰暑往寒來問如何是二界外事師曰洛陽千里餘不得
舊時書

廬山遠禪師法嗣

廬山開先善暹禪師臨江軍人也操行清苦徧游師席以明悟
為志叅德山見山上堂顧視大衆曰師子嘯呻象王回顧師忽
有省入室陳所解山曰子作麼生會師回顧曰後園驢喫草山
然之後至雪竇竇與語喜其超邁目曰海上橫行暹道者遂命
分座四方英衲敬畏之他日竇舉師出世金鵝師聞潛書二偈

于壁而去曰不是無心繼祖燈道慚未剷嶺南能三更月下離
巖竇眷眷無言戀碧層二十餘年四海間尋師擇友未嘗閉今
朝得到無心地却被無心趁出山晚年衆請滋甚遂開法開先
以慰道俗之望開堂日上首白槌罷師曰千聖出來也祇是稽
首讚歎諾代祖師提挈不起是故始從迦葉迄至山僧二千餘
年月燭慧燈星排道樹人天普照凡聖齊榮且道承甚麼人恩
力老胡也祇道明星出現時我與大地有情同時成道如是則
彼既丈夫我亦爾孰爲不可良由諸人不肯承當自生退屈所
以便推排一人半箇先達出來迺相開發也祇是與諸人作箇
證明今日人天會上莫有久遊赤水夙在荆山懷袖有珍頂門
有眼到處踐踏覺場底衲僧麼却請爲新出世長老作箇證明
還有麼時有僧出師曰象望嶺巖巖漫進途誰信螳螂能拒轍問
一棒一喝猶是葛藤瞬目堪眉拖泥帶水如何是直截根頭師

曰速曰恁麼則祖師正宗和尚把定師曰野渡無人舟自橫問
如何是露地白牛師曰瞎妙峰頂上即不問半山相見事如
何師曰把手過江來曰高出長安師曰脚下一句作麼生道
僧便喝師曰山腰裏走問一雨所潤爲甚麼萬木不同師曰羊
羹雖美衆口難調問年窮盡時如何師曰依舊孟春猶寒問
更深夜靜時如何師曰老入燈籠問瞥喜時如何師曰
適來菩薩面如今夜又頭上堂一若是二即非東西南北人不
知休話指天并指地青山白雲徒爾爲以拄杖擊香臺下座問
雨雪連天爲甚麼孤峰露頂師曰有甚遮掩處上堂僧問如何
是祖師西來意師曰洛陽城古曰學人不會師曰少室山高僧
禮拜師迺曰佛種從緣起遂舉拄杖曰拄杖子是緣且作麼生
說箇起底道理良久曰金屑雖貴落眼成翳卓拄杖下座
吉州禾山楚材禪智禪師臨江軍人也僧問佛令祖令諸方並

行未審和尚如何師曰山僧返後曰恁麼則諸方不別也師曰
伏惟伏惟問如何是離凡聖底向師曰山河安掌上曰恁麼則
迴超今古外師曰展縮在當人問一毫未發時如何師曰海晏
河清曰發後如何師曰徧界無知己問如何是和尚說法底口
師曰放一線道問抱璞投師註明師雕琢師曰不雕琢曰爲甚麼
不雕琢師曰弄巧翻成拙

秀州資聖院盛勤禪師僧問如何是正法眼師曰山青水綠問
四威儀中如何履踐師曰鷲嶽爲立雪曰恁麼則聞鐘持鉢曰上
欄干師曰魚躍千江水龍騰萬里雲曰畢竟如何師曰山中逢
猛獸天上見文星上堂多生學兒悟非干衲一點分明不在燈拈
拄杖曰拄杖頭上祖師燈籠吐下彌勒須彌山腰鼓細即不問
你作麼生是分明一點你若得無邊刹境總在你眉毛上你
若道不得作麼生過得羅刹城良久曰水流千派月山鎖一溪

雲字拄杖下座

潭川鹿苑圭禪師桂州人也僧問如何是道師曰吳頭楚尾曰
如何是道中人師曰騎馬踏鐙不如步行問如何是第一義諦
師曰胡人讀漢書上堂凡有因緣須曉其宗若曉其宗無是無
不是用則波騰海沸全真體以運行體則鏡淨水沉舉隨緣而
會寂且道兜率天宮幾人行幾人坐若向這裏辨得縑素許你
諸人東西南北如雲似鶴於此不明踏破草鞋未有了日在叅
青原下十世上

洞山聰禪師法嗣

南康軍雲居曉舜禪師瑞州人也少年麤猛忽悟浮幻投師出
家乃修細行叅洞山一日如武昌行乞首謁劉公居士家士高
行爲時所敬意所與奪莫不從之師時年少不知其飽叅頗易
之士曰老漢有一問若相契即開疏若不契即請還山遂問古

鏡未磨時如何師曰黑似漆士曰磨後如何師曰照天照地士
長揖曰且請上人還山拂袖入宅師憐憫即還洞山山問其故
師具言其事山曰你問我我與你道師理前問山曰此去漢陽
不遠師進後語山曰黃鶴樓前鸚鵡洲師於言下大悟機鋒不
可觸住後僧問承師有言不談玄不說妙去此二途如何指示
師曰蝦蟆趕鷓子曰全因此問也師曰老鼠弄狗屎上堂惟一
堅密身一切塵中現蝦蟆蚯蚓各有窟穴烏鵲鳩鴿亦有窠巢
正當其磨時爲甚麼人說法良久曰方以類聚物以羣分上堂
三峽道無別朝朝祇麼說僧縣會寫真與府出鎮鐵上堂不長
不短不小不大此箇道理是誰境界咄上堂問說佛法兩字早
是汚我耳目諸人未跨雲居門脚跟下如與三十棒雖然如是
也是爲衆竭力上堂舉夾山道開市門語取天子百草頭上
薦取老僧坐房即不然婦搗機軋軋兒弄口啞啞上堂諸方有

弄蛇頭撥虎尾跳大海劔刃裏藏身雲居這裏寒天熱水洗脚
夜間脫鞵打睡早朝旋打行纏風吹籬倒喚人夫劈篾縛起上
堂雲居不會禪洗脚上牀眠冬瓜直籠個瓠子曲彎彎弓

潭州大瀉懷宥禪師僧問人將語試金利火試未審衲僧將甚
麼試師曰拄杖子曰畢竟如何師曰退後著僧應喏師便打曰
教休不肯休直待雨淋頭

杭州佛日契嵩禪師藤州鐔津李氏子七歲出家十三得度十
九遊方徧參知識得法于洞山師夜則頂戴觀音像而誦其號
必滿十萬乃寢以爲常自是世間經書章句不學而能作原教

論十餘萬言明儒釋之道一貫以抗宗韓排佛之說讀之者畏
服後居永安蘭若著禪門定祖圖傳法正宗記輔教編上進
仁宗皇帝覽之加歎付傳法院編次入藏下詔褒寵賜號明教

宰相韓琦大叅歐陽脩皆延見而尊禮但之洎東還熙寧四年六

月四日晨興、寫偈曰後夜月初明吾今慧獨行不學大梅老貪
隨鼯鼠聲至中夜而化闍維不壞者五曰頂曰耳曰舌曰童眞
曰數珠其頂骨出舍利紅白晶潔道俗合諸不壞葬於故居永
安之左後住淨慈北磻居簡嘗著五種不壞贊師有文集二十
卷目曰鐔津盛行于世

洪州太守許式參洞山得正法眼一日與泐潭澄上藍溥坐次
潭問聞郎中道夜坐連雲石春栽帶雨松當時答洞山甚麼話
公曰今日放衙早潭曰聞答泗州六聖在揚州出現底是否公
曰別點茶來潭曰名不虛傳公曰和尚早晚回山潭曰今日被
上藍鯽破藍便喝潭曰須是你始得公曰不奈船何打破岸斗
泐潭登禪師法嗣

明州育王山懷璉大覺禪師漳州龍溪陳氏子誕生之夕夢僧
伽降室因小字泗州既有異兆僉知祥應齟齬出家牛角圓頂

篤志道學寢食無廢一日洗面潑水于地微有省發即慕參尋
遠造泐潭法席投機印可師事之十餘年去游廬山掌記於圓
通訥禪師所皇祐中 仁廟有詔住淨因禪院召對化成殿問

佛法大意奏對稱旨賜號大覺禪師後遣中使問曰才去豎拂
人立難當師即以頌回進曰有節非干竹三星偃月宮一人居
日下弗與衆人同 帝覽大悅又詔入對便殿賜羅扇一把題
元寂頌於其上與師問答詩頌書以賜之几十有七而至和中
乞歸老山中乃進頌曰六載皇都唱祖機兩曾金殿奉天威青
山隱去欣何得滿篋唯將御頌歸 帝和頌不允仍宣諭曰山
即如如體也將安歸乎再住京國且與佛法師再進頌謝曰中
使宣傳出禁圍再令臣住此禪扉青山未許藏千拙白髮將何
補萬幾霄露恩輝方湛湛林泉情味苦依依堯仁况是如天闊
應任孤雲自在飛既而遣使賜龍腦鉢師謝恩罷捧鉢曰吾法

以壞色衣以瓦鐵食此鉢非法遂焚之中使回奏 上加歎不
已治平中上疏丐歸仍進頌曰千簇雲山萬壑流閑身歸老此
峯頭餘生願祝無疆壽一炷清香滿石樓 英廟依所乞賜手
詔曰大覺禪師懷璉受 先帝聖眷累錫宸章屢旨誠懇乞歸
林下今從所請俾遂閑心凡經過小可菴院任性住持或十方
禪林不得抑逼堅請師既渡江少留金山西湖四明郡守以育
王虛席迎致九峯韶公作疏勸請四明之人相與出力建大閣
藏所賜詩頌榜之曰宸奎翰林蘇公軾知杭時以書問師曰承
要作宸奎閣碑謹已撰成衰朽廢學不知堪上石否見叅寥說
禪師出京日 英廟賜手詔其略云任性住持者不知果有否
如有切請錄示全文欲添入此一節師終藏而不出逮季頌後
獲於篋篋開堂日僧問諸佛出世利濟羣生狃座師登將一拯
濟師曰山高水闊曰華發無根樹魚跳萬仞峯師曰新羅國裏

曰慈舟不棹清波上劍峽徒勞放木鴉師曰脫却衣袋卧荆棘
曰人將試師曰憤得其便僧拊掌師曰更踣跳問聖君御頌
親頒賜和尚將何報此恩師曰兩手拓地曰恁麼則一人有慶
兆民賴之師曰半尋拄杖攬黃河問艣棹不停時如何師曰清
波箭急曰恁麼則移舟諳水勢舉棹別波瀾師曰濟水過新羅
曰古佛位中留不住夜來依舊宿蘆花師曰兒童不識十字街
問坐斷毗盧頂不稟釋迦文猶未是學人行業如何是學人行
業師曰所願望明月僧以手便拂師曰作甚麼僧茫然師曰賺
却一船人師曰若論佛法兩字是加增之辭廉纖之說諸人向
這裏承當得盡是二頭三首譬如金屑雖貴眼裏著不得若是
本分衲僧纔聞舉著一擺擺斷不受纖塵獨脫自在最為親的
然後便能在天同天在人同人在僧同僧在俗同俗在凡同凡
在聖同聖一切處出沒自在並拘檢他不得名邈他不得何也

爲渠能建立一切法故一切法要且不是渠渠既無有面第一不用妄與安排但知十二時中平常飲啄快樂無憂祇此相期更無別事所以古人云放曠長如癡兀人他家自有通人愛上堂文殊寶劍得者爲尊乃拈拄杖曰淨因今日恁麼直得千聖路絕雖然如是猶是矛盾相攻不犯鋒鏑如何運用良久曰野蒿自發空臨水江燕初歸不見人叅上堂太陽東昇爍破大千之暗諸人若向明中立猶是影響相馳若向暗中立也是藏頭露影漢到這裏作麼生吐露良久曰逢人祇可三分語未可全拋一片心叅上堂出法裏面迷却多少人佛法裏面醉却多少人祇如不迷不醉是甚麼人分上事上堂言鋒纔擊義海交深若用徑截一路各請歸堂上堂應物現形如水中月遂拈起拄杖曰這箇不是物即今現形也且道月在其麼處良久曰長空有路還須透潭底無路不用尋擊香臺下座上堂白曰東上白

日西落急如投壺閃寥廓神龍一舉透無邊纖鱗猶向泝中躍靈燄中休湊泊三歲孩童髮四角叅上堂良久舉起拳頭白握拳則五嶽倒卓展手則五指參差有時把定佛祖關有時拓開千聖空今日這裏相呈且道作何使用拍禪牀曰向下文長付在來日

臨安府靈隱雲知慈覺禪師僧問一佛出世各坐一華和尚出世有何祥瑞師曰白雲橫谷口曰光前絕後去也師曰錯曰大眾證明學人禮謝師曰點問如何是道師曰甚麼道曰大道師曰欲行千里一步爲初曰如何是道中人師曰西天駐泊此地都監僧禮拜師乃吽吽上堂日月雲霞爲天標山川草木爲地標招賢納士爲德標閑居趣寂爲道標拈拄杖曰且道這箇是甚麼標會麼拈起則有文有彩放下則糲糲磕磕直得不拈不放又作麼生良久曰扶過斷橋水伴歸無月村卓一下下座上

堂秋風起庭梧墜衲子紛紛看祥瑞張三李四賞虛虛拾得寒
山爭賤貴觀面相逢更無難易四衢道中棚欄瓦市扁寒虛空
普天巾地任是臨濟赤肉團上雪峰南山鼉鼻玄沙見虎俱眠
舉指一時拈來當面布施更若擬議千山萬水復曰過
婺州承天惟簡禪師僧問佛與衆生是一是二師曰花開蒲
紅花落萬枝空曰畢竟是一是二師曰唯餘一朵在明日恐
風問如何是吹毛劍師曰星多不當月曰用者如何師曰落
落後如何師曰觀世音菩薩問如何是和尚家風師曰理長即
就曰如何領會師曰繪雉不成雞問開口即失閉口即未審
如何說師曰舌頭無骨僧曰不會師曰對牛彈琴上堂去遮那
之境界衆妙之玄門知識說之而莫窮善則酌之而不竭文殊
體之而寂寂普賢證之以重重若也隨其法性如雲漢本
無一物若也隨其智用如花開春谷應用無邊雖說徧恒沙乃

同遵一道且問諸人作麼生是一道良久曰白雲斷處見明月
黃葉落時聞擣衣叅上堂莫離蓋纏莫求佛祖去此二途以何
依怙江淹夢筆天龍見虎古老相傳月不跨五叅上堂一刀兩
段埋沒宗風師子翻身拖泥帶水直饒坐斷十方不通聖脚
跟下好與三十上堂拈一放一妙用縱橫去解除玄收此破聖
若望本分草料大似磨麩作鏡衲僧家合作麼生良久曰寔
明州九峰鑿韶禪師僧問承聞和尚是泐潭嫡子是否師曰是
曰還記得當時得力句否師曰記得曰請舉看師曰左手握拳
右手把筆上堂山僧說禪如蚝蝨吐油捏著便出若不担著一
點也無何故祇爲不曾看讀古今因緣及預先排疊勝妙見知
等候陞堂便磨唇捩嘴將粥飯氣熏炙諸人凡有一問一答蓋
不得已豈獨山僧看他大通智勝如來默坐十劫無開口處後
因諸天梵天及十六王子再三勸請方始說之却不是秘惜祇

為不敢埋沒諸人山僧既不埋沒諸人不得道山僧會陞座象
婺州西塔顯殊禪師上堂黃梅席上數如麻句裏呈機事可嗟
直是本來無一物青天白日被雲遮參

天台崇善寺用良禪師僧問三門與自己是同是別師曰八兩
移來作半斤曰恁麼則秋水泛漁舟去也師曰東家點燈西家
為甚麼却覓油曰山高月上遲師曰道甚麼曰莫瞌睡師曰入
水鬼長人

臨江軍慧力有文禪師上堂建山寂寞坐倚城郭無味之談七
零八落以拄杖敲香臺下座

福州雪峰象敦禪師僧問如何是佛師曰把火照魚行曰如何
是法師曰唐人譯不出曰佛法已蒙師指示未審畢竟事如何
師曰臘月二十日

南康軍雲居守億禪師上堂馬祖纔陞堂雄峰便卷席春風一

吹木蕪地花狼籍便下座

瑞州洞山永孚禪師上堂棒頭挑日月木馬夜嘶鳴拈拄杖曰
雲門大師來也卓一下曰炊沙作飯看井作袴參

令滔首座又參泐潭潭因問祖師西來單傳心印直指人心見
性成佛子作麼生會師曰某甲不會潭曰子未出家時作箇甚
麼師曰牧牛潭曰作麼生牧師曰早朝騎出去晚後復騎歸潭
曰子大好不會師於言下大悟遂成頌曰放却牛繩便出家剃
除鬚髮著袈裟有人問我西來意拄杖橫挑囉哩囉

洞山寶禪師法嗣

瑞州洞山清辯禪師僧問百丈得大機黃檗得大用未審和尚
得箇甚麼師便喝僧亦喝師便打僧曰爭奈大眾眼何便歸衆
師噓兩噓

北塔廣禪師法嗣

荆門軍玉泉承皓禪師姓王氏眉州丹稜人也依大力院出家
登具後游方叅北塔發明心要得大自在三昧製犢鼻裩書歷
代祖師名字乃曰唯有文殊普賢較些子且書於帶上故叢林
目為皓布裩元豐間首衆於襄陽谷隱有鄉僧亦効之師見而
詬曰汝真何道理敢以為戲事耶嘔血無及耳尋於鹿門如所
言而逝張無盡奉使京西南路就謁之致開法于郢州大陽時
谷隱主者私為之喜師受請陞座曰某在谷隱十年不曾飲谷
隱一滴水嚼谷隱一粒米汝若不會來大陽為汝說破携拄杖
下座傲然而去尋遷玉泉有示衆曰一夜雨霽烹打倒蒲萄棚
知事頭首行者人力拄底拄撐底撐撐拄拄到天明依舊可
憐生自贊粥稀後坐牀窄先卧耳曠愛高聲眼昏宜字大冬至
示衆曰畧運推移布裩赫赤莫怪不洗無來換替僧入室次狗
子在室中師叱一聲狗便出去師曰狗却會你却不會師示疾

門人圍繞師笑曰吾年八十一老死昇死出兒郎齊著力一年
三百六十日言畢而逝

四祖端禪師法嗣

福州廣明常委禪師僧問知師久蘊囊中寶今日當場略借看
師曰看曰恁麼則謝師指示師曰等閑垂一釣容易上釣來
雲蓋顯禪師法嗣

南康軍雲居文慶海印禪師僧問如何是函蓋乾坤句師曰合
曰如何是隨波逐浪句師曰闊曰如何是截斷衆流句師曰窄
上堂道本無為法非延促一念萬年千古在日月白風恬山青
水綠法法現前頭頭具足祖意教意非直非曲要識廬陵米價
會取山前麥熟以拂子擊禪牀下座

上方岳禪師法嗣

越州東山國慶順宗禪師上堂心生則種種法生心滅則種種

法滅拈起拄杖曰此箇是法那箇是滅底心若人道得許你頂
明上具眼其或未然雲暗不知天早晚雪深難辨路高低參
金山新禪師法嗣

安吉州天聖守道禪師上堂日月遶須彌人間分晝夜南闍浮
提人祇被明暗色空留礙且道不落明暗一句作麼生道良久
曰柳色黃金嫩梨花白雪香參上堂不從一地至一地寂滅性
中寧有位釋迦稽首問然澄仁者何名爲受記便下座

卷第十五



